

Okuhabura Kwa Gaburieli Ahari Danieli

Jeffersonville, Indiana, USA

Okwamushanju 30, 1961

1 Mukama akuhe omugisha, ow'eishe-emwe. Muraire gye, banywani. Nihoockyeza kimwe, kuba omu tabirinaakuru akasheeshe aka, kwonka ni kirungi munonga okuba hanu. Tushemereirwe munonga kugira ngu tubaasize-tubaasize kutaahamu eriizooba ahawba saaviisi egi. Kandi ntumire ngu ninza kugira eishomo hati ahari ezi Saabiiti Makumi Mushanju Za Danieli. Eryo nirikwatana n'Obutumwa obwatsigara ntakabaasize kutandika O-Obumanyiso Mushanju. Obwo nibwo, Obumanyiso Mushanju; Ebibonaboneso Mushanju; Enzamba Mushanju; Ebibonaboneso Bishatu; omukazi omu izooba; okunagwa aheeru kw'omuregi orikutukura; emitwaro ikumi na ina n'enkumi ina kuteebwaho akamanyiso; byona nibibaho rwagati y'obwire obu. Mbwenu nteekateekire nti nintekwa kubanza naataasyamu eri.

2 Hati, nihootsya. Titugyendereire kuguma hanu omwanya muraingwa munonga, nk'oku turikubaasa. Kandi obu nibwo bunaku, burijjo, obunaku obu hatariho emirimo mingi, obu abantu kaangi bataza omu kanisa. Kandi, munomuno, kandi goona gaine ebishengye ebirimu ebyoma ebrikufukiiriza, n'ebantu nk'ebyo, ebirkugwisa gye. Kuri twine ekkyo, kwonka obwire obu titukiine.

Baatatenkuriitwe baangi bakashutama omu mushana ogurikwotsya. Ku nteekateeka aha ky'okushaba abantu okusaasirwa ahawb'okutagira kishengye ekirimu ebyoma ebirkureeta obufuki, ebiteekateeko byangye burijjo bigaruka enyima omuri Afrika ei baabaire baguma aho omu ihunga eryo, n'abakazi abo n'eishokyre ryabo ribagwire aha buso, baguma aho nyekiro na nyomushana, batarikuruga aha mwanya ahu bari; batarikurya, kunywa, nari ekintu kyona, baguma aho honyini kukwata Ekigambo kimwe, nari bibiri, rimwe na rimwe, kya Mukama.

3 Nimbaasa kuteekateeka ahari Mexico obu eba neeyokyeza kimwe kuhitsya obu, buzima, naashutamire omu kishengye ekirimu ebyoma ebirkureeta obufuki kandi nkaagyezaho kwehuuhirira, kikaba nikyokyeza kimwe. Kandi kureeba abantu abo nibahika aho shaaha ishatu z'akasheeshe, omu kishaayi kihango ekkyo, kandi hatariho ntebe z'okushutamaho. Abantu abarwaire, barwariire kimwe, nibafa, barwaire; ekookoro, ebizimba; n'abazaire abakazi barwaire, abeereere bato, nibafa na buri kintu, beemerera aho honyini omuri eryo izooba erirkwotsya munonga, hatariho kacuucu ahantu hoona, reero bafa kwegamirana kuruga shaaha ishatu omu kasheeshe okuhitsya shaaha ishatu ekiro ekkyo, okuhurira edakiika makumi ashatu zonka kurabira omu muvunuuzi, kandi n'okureeba emirimo ya Mukama. Bashutama aho kandi bategyereza, bajwaire ebijwaro bihanggo bikuzire ebirkureemeera, babijwara omu nshumi z'obutiti n'ez'ekyanda. Nibyo ebyo byonka ebi baine.

4 Reero nintekateeka aha ky'okubyama aheeru okwo omuri ago mahamba, oku baabaire bareeta abo barwaire, abaabaire batarikubaasa nangwa n'okugyenda. Kandi n'omuri Buhindi, obu baabaire barunda omwe ahansi, bwanyima bakatungika ondijo ahaiguru y'ogwo, ondijo ahaiguru y'ogwo, nka batyo, baine ebibembe n'endwara; ahu baabaire babakurura kubarabyamu, n'okuruga omu nguuto z'omu ndembo, reero bakababyamya omuri ogwo mushana ogurikwotsya, nigubira, gw'ebicweka ebirkurabwamu omuhanda gw'eizooba. Omu eihunga, n'emirabyo erikurabya, n'ebantu nk'ebyo, bakaba babyama aho honyini omuri ogwo mushana n'eihunga, na buri kintu, kandi batarugyeho nari okwetomboita, nka . . . kandi bagyezaho kukwata Ekigambo kya Ruhanga, rimwe na rimwe, ekintu ky'emwoyo yaabo. Mbwenu ahawb'enki turikushaba okusaasirwa akasheeshe aka, turi omu nju, ebihuuhiso by'embedo nibihuuhua? Tushemereire kukwatwa enshoni ku turaakyetomboitire.

5 N'ahawb'ekyo niinyijuka obwire bukye obuhingwire, aha kirwa, kimwe aha birwa okwo omu Nyanja empango z'Obukiizi-bwa-buryo, nkaba nyineyo saaviisi ekiro ekkyo. Kandi, oo, haimukaho eihunga. Oo, tinkareebaga eihunga nk'eryo, okumyasa kumwe kwonka kw'omurabyo ahanyima y'okundi, kumurika ensi. Kandi n'oku emiyaga yaabaire neehuuha kuhitsya obu emiti yaabaire egwerekere kimwe ahansi. Naagira nti, "Mbwenu, niba . . . Nimbaasa n'okujuura eshuuti yangye, ahawb'okuba tiharikuza kubayo muntu n'omwe eifo okwo."

Omukama kakye akamotoka kakye kaateera ekibunu aha rwiggi, reero omuntu yaakongoota aha rwiggi, ayeteekateekire kugyenda.

Reero naagambira omwojo, akaba naabaasa kugamba Orungyereza, naagira nti, "Hariyo omuntu eifo okwo?"

Ati, "Torikubaasa nangwa n'okuhika aha byombeko by'omu rurembo omu mwanya ogwo," omu kishaayi kihango ky'omupiira.

Reero naagira nti, "Noomanyisa ngu abantu ba-bariyo ebiso okwo batyo," naagira nti, "n'eihunga eri ryona?"

Baagira bati, "Nibenda kuhurira ebikwatsire ahari Ruhanga."

6 N'a-n'ahawb'ekyo naashuumayo eifo okwo. Kandi hakaba hariyo abakyara, abaishiki bato, eminyeeto, batarikuhwiwitsa n'okusheka, kandi n'okunena za swiiti gaama, n'okugamba ahari nkunzi zaabo. Buri Kigambo, Nibakiramatiiraho; kandi bataayehiga, bashutama kwonka reero bakahurikiza. Oyete abantu kwija omumaisho kujunwa, ofe kweta abantu omumaisho ngu bajunwe, reero enkumi n'enkumi baimuka, n'emiziga erikubaruga omu maisho nka batyo, n'emikono yaabo eri ahaiguru ahari Ruhanga, nibenda embabazi ahawb'amagara gaabo, abaishiki bato n'aboojo, emyaka ikumi na mushanju, ikumi na munaana y'obukuru. Hati ni nk'ekigumire kutunga abantu abakuzire okuhurikiza, nimureeba. Ni-nikyoreka ngu tihaine eki twine ekky'okwetomboitera. Ruhanga

asiimwe! Eego, sebo.

Tukaayenzire ngu byona tubigire biri eby'omutindo nk'Abanyamerika abandi, kwonka titubiine omuringo ogwo; n'ahabw'ekyo nituza kukora n'eki twine.

7 Hati, nyine ekintu kikye eki nyetegyereize eki nkaayenzire kukora hanu omu tabirinaakuru omurundi ogundi. Ni bangahi abaine Zaabaiburi, mwereeze emikono yaanyu. Ni kirungi. Ka tubikuure Zaaburi 99 tutakashabire. Tukaba tukora eki, Ow'eishe-emwe Neville, obwire buraingwa enyima. Tindikumanya yaaba . . . Mwashomire Zaaburi akasheeshe aka? [Ow'eishe-emwe Neville yaagira ati, "Ngaaha,"-Omur.] Ngaaha. Nkaayenzire ngu, abateeraine, bashome Zaaburi emwe.

Akasheeshe aka, obu naaba nshutami omu kishengye kyangye ky'okushomeramu, nintekateeka aha Butumwa obu n'Ekigambo, naateekateeka nti, "Noomanya, kikaabaire kirungi omurundi ogundi boona-boona kushoma Zaaburi emwe. Ninkikunda gye munonga."

Enshonga eyaatuma naakyerererwaho kakye, banteerera esimu okuruga hare, kuruga Cheyenne, n'ahabw'ekyo egoyi niyo nshonga eyankyerereza.

Kandi hati, obwo turiyo nitubiikuura Zaaburi egi, nyine ebirango by'okuranga, ebi bampa. Egyo ni Zaaburi 99.

8 "Okuruga hati, ebirango byona ebikwatsire aha nteerane omu tabirinaakuru hanu, kandi n'omu hururu y'okubuirira aheeru, nibija kuruga omu ofiisi omuri Jeffersonville. Weena orikwetenga kumanya aha nteerane naaragiirwa kuhandiika, nari bahe amaziina gaabo n'endagiiriro, reero babite aha kituuti aha kuhendera kwa saaviisi ekiro eki. Okumanyisibwa nikwija kukwohererezibwa omu bwire kugira ngu oyetebeekanise kuba omu nteerane."

Ekyo nikimanyisa, omuntu weena omu biro by'omumaisho ku araayende kumanya ei turikuza kugirira enteerane, twine entwaza eteirweho, aha offisi aheeru aho hati, ahu orikubaasa kuta eiziina ryawe n'endagiiriro hanu. Reero nitwija kukwohererezibwa kaada, obwire butakahikire, kugira ngu omanye ahu enteerane ziriyo nizigyenda omumaisho, kandi obundi n'amashomo, n'ebindi ebiriho, ku waakubaasa kutunga omugisha. Nimureeba, ku oraabe otaine mwanya gw'okukoreramu ogwetongoire ahu birikuruga, omwe naagamba eki n'ondijo agamba kiriya, to-torikuitunga, nimureeba. N'ahabw'ekyo ka . . . Handiika eiziina ryawe n'endagiiriro reero obite hanu, reero Billy Paul naija kubiihaho kandi abibamanyise.

9 Hati, kikabuuzibwa, nabwo, ku haraabe harikwija kubaho ezindi . . ." Ow'eishe-emwe Branham, noija kugiraho ezindi saaviisi z'okutambirwa omuri tabirinaakuru, n'okumanya ebiri omu mitima y'abantu?" Ngaaha. Ngaaha. Okumanya ebiri omu mitima y'abantu nikwija kuheebwa a-akakiiko kaitu akandi. Twine Ow'eishe-emwe Neville hanu hati oine ekiconco ky'obunabi, oragurira abarwaire kandi akabamanyisa ebantu ebi barikwetenga kumanya. Kandi twine Ow'eishe-mwe ow'eiziina rya Higg- . . . Higginbotham, omwe . . . akaba ari omubiiki, yaakora n'obwesigwa aha kakiiko. Tindikumureeba akasheeshe aka, kwonka burijio aine ekiconco ky'okugamba omu ndimi. Kandi n'omukyara mukye orikwetwa Arganbright, ow'eishe-emwekazi mukye oboneire oine ekiconco ky'okushoboorora endimi.

10 Kandi obutumwa obu bukwaitse nibuhamibwa ku buri obwa Ruhanga, ahaw'okuba buzima tiburikuruga omu buteeka, buri omu buteeka. Kandi ahonaaho ebiconco ebi ku biraatandikye kukanya, nituza kugyezaho kutunga e . . . okubigarurira kimwe biteebwe omu kanisa, omuringo ogw'okukikoram. Kandi nyine kubareeba juba juba, kandi kugira ngu e-ngu e-enteerane ziije kugumizamu gye munonga omu buteeka bwa Mukama, nk'oku turikubaasa kikitunga gye munonga.

Kwonka abantu aba abakundwa, mutaahi wangye nikwo arikugira, Muka Woods, abaine omuzindaaro gushumikire hanu, kandi n'orutambi rw'amaraka enyima okwo, okukwata oruteerane aha rutambi rw'amaraka, kigyendereirwe kutunga obwo butumwa kwonka, kandi n'okubuhandiika, reero bakareeba yaaba buhikire nari butahikire. Mwareeba? Okwo nikwo arikubukyebera. Nimmanya ku Muka Woods ari omukazi omwesigwa. Kandi nangambira ngu ebantu bingi ebigambirwe, biriyo nibihikiirira.

11 Hati, nitusima ahaw'ekyo. Ekyo ka nikimpwera omuka, naahika omuka, obwo. Okwo kumanya ebiri omu mitima y'abantu aha rubaju rw'okuragura nikuumara amaani, kandi, n'ahabw'ekyo, Ruhanga anyoherereize obuhwezi ahaw'ekyo, kurabira omu bunabi n'okugamba omu ndimi, kandi n'okuzishoboorora, nibwo bunabi. Nikyo, obunabi, okugamba omu ndimi. Hariho abantu babiri abatarikushushana nibaragura. Omwe naagamba, ondijo naayetegyereza eki ogwo arikugamba omu ndimi ezitarikumanya, buzima kwo n'obunabi. Mbwenu hati nitwija . . . Ekyo tukiine buri izooba, buri kuteerana hanu obu twine enyiriri z'okushabira abantu omu kuteerana.

12 Hati, hariho omuntu kandi owaakubuuza, akabuuzza . . . aha kiconco. Eego, nkikiine. Kwonka omuringo ogwo, omuringo gwonka ogu ndikukikoresa, n'aha kwehanuuza omu mubonano, eki nkiriyo ninkora. Kandi, okubitunga, niinyikiriza babiine aha rubaho rw'amakuru enyima aho, okwikirizibwa kandi n'okutaho obwire bwawe omu buteeka, na Billy Paulo, mutabani wangye, ahawba hanu nari omu nteerane ahanyima y'oru. Okwo omu kubuurira aheeru, ahantu hoona, nooteekwa kugira ka kaada kakye ahu Billy Paulo araije kukuha. Ku haraabe hariho ekintu omu magara eki otarikubaasa kwetegyereza, kandi otarikumanya oku waakukirugamu, kandi noosherura

obwengye bwa Mukama, obwo ka . . . Reeba Billy Paul, mutabani wangye, niwe muhandiiki, reero naija kukuha ka kaada kakye, kandi akuteereho ekiro ky'okwezi, buri omwe okwe.

Reero twaba twine okwo kwehanuuza omu mubonano, obwo nibwo obu turaataahemu hamwe, iwe naanye twenka. Kandi baaba bari abakazi abarikwija, noi ja kutaahamu naanye n'omukazi wangye. Reero o . . . Nitwija kureeba, kandi tusherure Mukama reero Tumubuuze eki orikuteekwa kukora.

13 Hati, ezindi, nshonga nkye n'ebindi nk'ebyo batyo, bihairwe Ow'eishe-emwe Neville, n' Ow'eishe-emwe Higginbotham, n' Ow'eishe-emwekazi Arganbright, n'abandi abagamba omu ndimi kandi bakashoboorora, abari hanu omu kanisa.

N'ahabw'ekyo, turi nk'abari omu rugyendo. Niinyikiriza akaba ari Yesero, owaagambiire Musa ekiro kimwe, mwareeba, ati, "Ka tukwate abakuru bamwe." "Reero Omwoyo wa Ruhanga yaihwu ahari Musa kandi yaateebwa aha bakuru makumi mushanju, reero baaragura. Kwonka ebintu ebikuru kandi ebigumire bikaba bisa ahari Musa wenka." Hati, tituri Musa, n'aba tibari abakuru, kwonka nitukiheereza Ruhanga Yehova, n'Enyomyo y'Omuriro niyo emwe erikutwebembera kutuhitsya omu Nsi eyaaraaganisiibwe.

N'ahabw'ekyo, obwo, eego, nihaza kubaho ebendi, nihaija kubaho enteerane kandi habeho n'okushobo- . . . Okumanya ebiri omu mitima y'abantu nikuza kwija. Ekyo nikija kuba nikimpa omwanya obwo kuba omu kushaba kandi n'okushoma, ebiro ebi ndikumanya ngu okwehanuuza omu mubonano ebi nibiza kwija, kandi myeteekateekyere.

Hati mwijukye, Billy Paul Branham, omuhandiiki weitu w'enteerane z'aheeru, naija . . . Ziri aha . . . Ebirango biri aha rubaaho enyima aho, biteirweho ababiiki. Nyine akahandiiko hanu k'okuranga ebyo, n'okugambiraabantu ngu nibabaasa kubishoma aha rubaaho rw'ebirango, baaba nibashohora.

14 Hati, hati, akasheeshe aka twine eishomo rikuru, kandi ekiro eki nituza kugyezaho kurigumizamu. Kandi, Mukama ku araakunde, Sande erikukurataho, endijo, nituza kugumizamu naryo. Mbaire ntarikumanya oku ribaire niritaahiria kimwe omunda okuhitsya obu ntandikire kurishoma. Kandi nabwo rikiri enaama ahariinye, nabwo, n'ahabw'ekyo niinyesiga Mukama.

15 Hati, imwe abaine Baiburi zaanyu, ka tubiikuure Zaaburi 99, 99. Kandi ninza kushoma omushororongo gwa 1, abateeraine bashome omushororongo gwa 2, bwanyima twena hamwe nituza kushoma omushororongo gw'aha muheru. Nituza kugumizamu omumaisho; nyowe, ogwa 1; abateeraine, ogwa 2; nyowe, ogwa 3; abateeraine, ogwa 4; kugumizamu kuhika aha mushororongo gw'aha muheru, reero bwanyima twena nituza kugishoma hamwe.

Kyo ka twemerere twaba nitushoma Ekigambo kya Ruhanga. [Ow'eishe-emwe Branham n'abateeraine baashoma Zaaburi 99:1-9 nk'oku yaayoreka-Omur.]

MUKAMA ari aha ngoma; k'amahanga gateteme! Ashutami ahagati ya baakerubi; k'ensi etengyete!

MUKAMA ni mukuru omuri Saayuuni; (Kandi) ari ahaiguru (y'abantu boona).

Ka bahimbise eiziina ryawe erikuru kandi eririkutiinisa; (ahakuba n'eririkwera).

Omukama okunda eby'oburyo; Niiwe otaho obwinganisa omu bantu; okacwa emanja z'oburyo n'okuhikiirira omuri Yakobo.

Muhimbise MUKAMA Ruhanga waitu; Mumuramize omu maisho g'akatebe k'ebigyere bye, ahakuba n'orikwera.

Musa na Arooni bakaba bari omu banyamurwa be, na Samueli ari omu barikutakira eiziina rye. Bakatakira MUKAMA, yaabagarukamu.

Akabagambira ari omu nyomyo y'ekicu, baayorobera ebi yaahamize n'ebiragiro ebi yaabateereireho.

Ai MUKAMA Ruhanga waitu, okaba obagarukamu; okaba ori Ruhanga orikubasaasira, n'obu oraabe waabahoire enzigu ahabw'ebibi ebi baakozire.

Muhe MUKAMA Ruhanga waitu ekitiinisa, mumuramize aha kibungo kye ekirikwera. Ahakuba MUKAMA Ruhanga waitu n'Orikwera.

16 Ka twinikye emitwe yaitu.

Buzima, Mukama, Ebigambo ebi bihandiikirwe kandi byateebwa omuri Zaaburi n'omuheereza Waawe, Daudi, Ahariiwe. Iwe otuura ahagati ya Baakerubi. Iwe ori orikwera, kandi n'ekibungo Kyawé n'ekirikwera. Ka twirire haihi n'emitima yaitu emiisirwe Eshagama ya Mukama Yesu, n'emitima etarikweshinja, kandi twine okwikiriza n'obuhame ku nitutaaha omu Kubaho kwa Ruhanga waitu. K'abantu aba boona akasheeshe aka bacureere. Igura amatu gaitu g'okwetegyereza. Gambira omuriitwe, omu bwengye, kugira ngu tubone kumanya oku tushemereire kwetwara omu biro ebi kandi n'omu Kubaho Kwawe.

17 Nitukushaba, Ruhanga waitu, kutushuuruurira ebintu ebi eby'enaama ebitwire bisherekirwe obwire buraingwa obu bwona, nk'oku turikwirira haihi kimwe omu Bigambo ebirukukirayo kuba eby'amazima, ebitarikuzaana. Okabigambaho obu Waabaire ori hanu omu nsi, kandi waagira oti, "Orikushoma, ayetegyereze." N'ahabw'ekyo, nitwija Ahariiwe n'obucureezi oburukukirayo, Mukama, n'okusherura obwengye Bwawe, tutarikumanya eky'okugamba. Tutebeekaniise hanu Ebyahandiikirwe bikye, haza tutarikuzaana kandi Nitukwesigira kimwe ahabw'eky'okugamba, ahakuba tihariho kigyendererwa ekindi kureka kugira ngu tukaabaasa kumanya obwire obu tutwiremu, ngu tubone kwetebeekanisa ahabw'ebintu bikuru ebiri omumaisho. Kituhe, Mukama, omu Iziina ry'Ogwo owaatwegyeise twena ku tushemereire kushaba tuti! [Ow'eishe-emwe Branham n'abateeraine baashaba hamwe kurugiirira ahari Matayo 6:9-13 -Omur.]

. . . Tataitwe ow'omu iguru, eiziina ryawe ryezibwe,

Obukama bwawe bwije; eby'okunda bikorwe omu nsi nk'oku bikorwa omu iguru;

Otuhe hati eby'okurya byaitu eby'obutoosha;

(Kandi) otusaasire (eby'okushiisha) byaitu, nkaitwe oku tusaasira (abo abarikutushaagiza).

Kandi otatutwara omu kwohibwa kureka otujune omubi.

(Ahakuba obukama, n'obushoboorozi, n'ekitiinisa n'ebyawe; ebiro n'ebiro. Amiina).

Mushutame. Hati, omushaija weena ku araabe naayenda kujuura ekooti ye, ahurile aine obugabe. Kandi n'abo abeemereire aha-aha mbaju z'ebisiika, ebigyere byanyu ku biraashaashe, ahabw'enki, muhurire mwine obugabe kuza aheeru.

18 Kandi hati, ninneekateeka, abaana ku baraabe nibenda kuza omu bishengye byabo, nari baagyenzire? [Ow'eishe-emwe Neville yaagira ati, "Ngaaha, tibarikubaasa. Titurikubaasa kuba nabo akasheeshe aka, ahabw'enshonga y'abantu baangi."-Omur.] Omuriisa yaagira ngu abantu baijwire ebishengye ebyo, n'ahabw'ekyo titurikubaasa kugira Sande sikuulu ahabw'abaana bato. Mbwenu nituza kushemererwa imwe abaana bato ku muraakwatanise naitwe, nk'oku akasheeshe aka twine, nitutandika Obutumwa bukuru oburikutangaaza obu ndikuhamya ngu nibuza kugira amakuru maangi ahari sho na nyoko, n'abakundwa baanyu abari hanu, kandi nangwa n'ahariimwe abaana abato. N'ahabw'ekyo, nitubutandika n'obucureezi bwingi.

19 Mukama ku araakunde, akasheeshe aka nitukwata eishomo rya saabiiti mukumi mushanju za Danieli. Kandi akasheeshe aka nitugamba ahari Danieli ari omu bukwatwa, na Gaburieli arikuguruka kwija kumumanyisa ebikwatsire aha by'ebiro by'omumaisho. Danieli ku yaabaire ari omu kushaba, Gaburieli ogwo, Maraika, yaataahamu kumumanyisa.

Ekiro eki, niinyenda kugamba aha bigyendererwa mukaaga by'okutaayaaya Kwe, amashomo mukaaga agatari gamwe ag'okutaasyamu ekiro eki, agaiziire Gaburieli.

Sande erikukurataho, Mukama yaakunda, niinyenda kutaho enshonga kandi n'obwire bw'Obusingye Mushanju bw'Ekanisa, kandi n'obwire obu zirimu, n'ahu twemereire ebiro ebi. Ekyo kiriho akasheeshe ka Sande erikukurataho, Mukama yaakunda.

20 Hati, enshonga y'eki. Ndeetsire ebihandiiko bikye kuruga omu Butumwa bwangye bukye obw'enyima. Kandi akasheeshe aka niinyenda kubugarukamu omu bugufu, ahabw'okuba obu nibukwatwa aha rutambi rw'amaraka oruraije kujanjaara omu nsi yoona, omu mahanga maangi. Kandi, obutoosha, enshonga erikutuma naabugarukamu omu bugufu, ni ngu obundi omuntu akaahurira orutambi rw'amaraka omurundi gwe gw'okubanza, reero ataabaase kwetegyereza eki naabaire nimmanyisa ku ndaajurize enyima aha kintu ekindi.

Hati tumazire emyezi nitwega omu Kitabo ky'Okushuuruurwa, Okushuuruurwa kwa Yesu Kristo. Turabire omu busingye bw'ekanisa. Eshuura ishatu z'okubanza ez'ekitabo ky'Okushuuruurwa zikaba ziri obusingye bw'ekanisa mushanju. Bwanyima Yohaana yaatwarwa omu iguru omu shuura ya 4 n'eya 5, reero yaayorekwa ebintu ebya-ebiyabaire nibyenda kwija. Hati, omu shuura ya 6, naagaruka ashuma omu nsi, kureeba ebintu nibibaho ebiraije kuruga omu shuura ya 6, omushorongo gwa 1, okuhitsya eshuura ya 19 n'omushororongo gwa 21. Omu nihataahamu Obumanyiso obwo, Ebibonaboneso, Ebibonaboneso, enzigye, o-omukazi omu izooba, n'okunagwa aheeru kw'ekijoka ekirikutukura, okuteebwaho akamanyiso kw'emitwaro ikumi na ina n'enkumi ina, n'ebintu ebi byona.

21 Egi ebaire saabiiti y'okushoma kw'amaani munonga. Nyomwebazyo, eizooba ryona, haihi tindugire omu kishengye, ningyezaho kushoma. Kandi n'ekintu omu bwire bw'aha muheeru, baingi ahari ba k'aha kaira hanu, abu naayegyeise, nkafa kugira nti, "Omuharimu saabiiti makumi mushanju za Danieli," kwonka tindagyerizeho kuzitaahamu, okuzishoboorora. Kwonka obwire obu, ahabw'embabazi za Ruhanga, nkyeteireho nyowe nyenka kugyezaho kushaba embabazi omu maisho ga Ruhanga, ngu mbaase kuzireetera abantu. Kandi omu ndiyo nimbona ebintu ebi ntarikumanyaho kintu na kimwe.

22 Kandi, n'ahabw'ekyo, ntwi-ntwire ninshoma ekitabo kya Dokita Larkins, ekitabo kya Dokita Smith, ebihandiiko bya Dokita Scofield, ebirkushoboorora ebitari bimwe kuruga omu bantu hoona hoona, kandi nabwo

tindikubaasa kuta ebyabo hamwe kutuma kyarugamu gye. Mwareeba? N'ahabw'ekyo, saabiiti egi nyine puraani, mbaire nintaayaayira eibiikiro ry'ebitabo omuri Kentucky, ahari zaakarenda zimwe z'eb'y'abashomi b'enyonyyoozi n'eb'y'omu kaabunga n'obwire, kandi niinyiha omu mabiikiro g'ebitabo gatari gamwe, n'ebindi nk'ebyo, ebitabo bya ira byona ebi ndikubaasa, n'ebyo bikye ebi ndikubaasa kukora, kandi nyiniire kimwe obwesigye bwangye omuri Yesu Kristo kuzinshuururira.

Ahabw'okuba, tindikwenda ngu kigire kit, "Nimmanya eki, kandi nimmanya kiriya." Naamanya omutima gwangye. Ampurikiize. Kwonka ninzenda, kugira ngu mpabure abantu Be, n'ahabw'ekyo niinyikiriza ngu Naaza kuzimpa. Tinkamanyire na hati, kwonka Mwesigire ahabwa Sande erikukurataho, 'habw'okuba ekyo nikiza kuba ekicweka kikuru munonga, Sande erikukurataho, kumanya n'okuta ezo saabiiti makumi mushanju omu mwanya gwazo.

Buri emwe eine omwanya gw'omutaano. Kandi ku oraakore ekintu ekyo, okazirabamu zonna, tizirkwija gye, tizirkutaahamu gye. Tizirkubaasa. Kandi, n'ahabw'ekyo, ni-nimbaasa kutabaasa kubitunga gye, kwonka ninza kwesiga Mukama ahabwazo.

23 Kandi niinyijuka Sulemaani obwire bumwe arikushaba kandi naashaba Mukama Ruhanga yaaba Yaakumuha obwengye, butari bwe ahabwe, "kutari kwongyerwaho ebiro, kutari kuhangaara, butari bugaiga," kureka ngu akaabaasa kugira obwengye kumanya oku-oku-oku araacwere emanja abantu ba Ruhanga. Kandi Ruhanga akaha ekitiinisa eshaara egyo, reero yaaha Sulemaani obwo bwengye, ahabw'okuba bukaba buri obw'abantu Be. Kandi egyo niyo nshonga ei ndikushabira Ruhanga okuunyikiriza kumanya eki ezi saabiiti makumi mushanju zirkumanyisa, ahabw'okuba nimmanya ngu ni karenda ehikire ahabw'obusingye obu tutwiremu. Kandi, n'ahabw'ekyo, niinyenda kuzimanya; t'ahabwangye, ndi . . . t'ahabwangye. N'eky'amazima, niinyenda kuzimanya. Tindikukigamba omuringo ogwo nti, "T'ahabwangye," ahabw'okuba niinzenda ahabwangye. Niinyenda kumanya, ahabw'okuba niinyenda kumanya ahu tutwire kandi n'obwire obu tutwiremu. Kandi, obwo, nimmanya ngu ekyo nkihairwe.

24 Kandi abantu abatari bamwe bakiteebereize, reero bakita enyima okwo hare. Omuntu omwe, mbaire ninshoma, zonna akazikora zaahwera omu gwa 1919, ezo saabiiti makumi mushanju. Mpaho, ekyo kikaba kitari kityo.

N'ahabw'ekyo, ahanyima ya saabiiti makumi mushanju, ahanyima ya saabiiti makumi mushanju, byona bihweire. N'ahabw'ekyo ti-tituri . . . Nitwenda kumanya Amazima. Kandi ninshaba Ruhanga kumpa Amazima.

25 Hati, kwenda ngu eki nkiteereho omusingye, kugaruka enyima, niinyenda kugarukamu eby'enyima kakye. N'ahabw'ekyo, mbwenu, ebihandiiko bimwe ebi naahandiikire, ebi tubaire twine omu shuura ya 5, eya 4 n'eya 5, kugira ngu abantu beetegyereze. Eky'okubanza, tutakakozire eki, niinyenda kugaruka omu by'enyima kakye, kugira ngu mukitungye kuruga aha ya 4 . . .

Hati, mwijukye, eshuura ya 3 bukaba buri Obusingye bw'Ekanisa ya Laodikea, kandi Ekanisa ekatwarwa aha muheru gwa Laodikea.

26 Hati, mbaire ningyezaho kushoboororera omukazi wangye ekintu ekikikwatsireho. Mbaire ndi na Becky, muhara wangye, twine zaakashoborozi z'emiringo yoona etarikushushana n'ebintu ebi tubaasize kutunga. Tizirkushoboorora. Nyine kashoborozi ya Baiburi. Nyine kashoborozi y'Orugriika eya ira. Nyi-nyine Za-Zaawebster kandi n'ezindi nyingi, zaakashoborozi ez'omutindo. Tihariho n'emwe omurizo ebaasize nangwa . . . kuha ebigambo nari enshoboorora, omu muringo gwona.

Omukazi wangye agizire ati, "Noikiriza ota ngu abantu baitu, abari abantu abooro, kandi baingi omuribo bateegire nk'oku naitwe tuteegire, okwetegyereza ebintu nk'ebyo?"

Naagira nti, "Ruhanga naija kuha eky'okugarukamu."

N'obu kyakuguma kita, Ruhanga naabaasa kukishoboorora kandi akyorobye. Ahakuba turi e . . . ekicweka ky'abantu abo abaine ekihika, nibashabira ekiro ekyo n'obwire obwo. Kandi amaisho gaitu tugahangire Eiguru, kandi tuteegyereize Okwija Kwe. Kandi nimpamiza kimwe ngu Naija kutworeka. Hati, tikirkwija kutugambira ekiro n'obwire, 'habw'okuba tihariho muntu n'omwe orimanya ekyo, kwonka buzima nikija kutugambira ekiro kya saabiiti ei tutwiremu, ku twakubaasa kikitunga.

27 Hati, omu shuura ya 4, Yohaana akatwarwa ahonaaho, ahanyima y'Ekanisa. Yohaana, ku yaagiire omu iguru, yaareeba obusingye bw'Ekanisa bwona. Aho niho nkaayenzire kwemerera, nk'esekenda, kugira, nti: abantu baingi abainiire ekihika omu bintu bimwe by'amaani, bikuru, eby'okutangaaza kubaho, omu busingye bw'Abanyamahanga, buzima bagwire. Obusingye bw'Ekanisa, na byona ebiribaho omu butegyeki bw'Abanyamahanga, borthandikirwe kuruga omu shuura 1 y'Okushuururwa okuhitsya omu shuura ya 3 y'Okushuururwa, ebariirwemu. Bwanyima Ekanisa ekabakurwa kandi yaatwarwa, n'ebindi ebi, okuhitsya omu shuura ya 19, n'ebyo ebiriba aha ruganda rw'Abayudaaya, ahanyima y'Ekanisa kutwarwa. Kandi n'obwire bw'Okubonabona kwingi, tihariho kintu kyona ky'okubaho omu Banyamahanga; okwitwa kwonka, n'ebindi nk'ebyo, nk'oku ekyo turaije kukihikaho reero tukareeba.

Kwonka Ekanisa, Yo yonka, neeba yaagyenzire omu ya 13 . . . Aha mushororongo gw'aha muheru gw'eshuura ya 3 y'Okushuuuruwa, obu Obusingye bw'Ekanisa ya Laodikea buraahwe, nibwo bwabaire buri obw'aha muheru.

28 Kandi tukwatsire buri busingye bw'ekanisa, buri bwire, buri kintu ekyabaireho, buri nyonyoozi, buri ntumwa, obuhangwa bwabo, eki baakozire, reero twakireetera kimwe kurabira omu byafaayo okuhitsya aha w'aha muheru wenyini, twabateera aho honyini aha kishushani, aha mbari y'ekisiika. Kandi ku tumazire, Omwoyo Orikwera yaataahamu kandi yaakora enziga y'ekintu nikyo kimwe aha kisiika, reero yaakishuuura We Wenka hanu honyini ahariitwe twena.

Hati, omu kukora eki, niinyesiga, aha muheru gw'eki Naija kwija n'ekintu ekirikutangaaza kandi atworekye omurundi ogundi ku turi omu bwire bw'aha muheru.

29 Ni bangahi omuriimwe abahuriire Kennedy . . . ebigambo bya Purezidenti Kennedy, ebi yaagambire n'ebindi nk'ebyo? Ni bangahi abahuriire okuteebereza oku, ngu ekiro 1 Okw'okubanza, kiteebereziibwe ngu zombi Amerika na Russia nizijja kuba eiju erirkuruga omu rushozi orurikwakamu omuriro? Nikyo ekyo kyonka eki turikwetenga. Obwire buhweire kukira oku turikuteekateeka. Mwareeba? N'ahabw'ekyo, ku turaabe turi haihi munonga okuhitsya obu nangwa n'abantu b'ensi egi bariyo nibateeberesa ekintu eki eky'akabi kubaho, ekirungi tube aha buzoora maisho, buri kintu kibe gye buzima, okweteisa kwona kukorwe, buri kintu kyeteekateekire, 'habw'okuba titurikumanya obwire obu Mukama waitu arikuza kutweta. Kandi ku Araatwete ati, "Ija kunu ahaiguru," kikaabaire kirungi obe oyeteekateekire. Kandi nikiza kwija omu shaaha ei otarikuteekateeka.

30 Okusisiimuka kw'amaani okw'Abapenteekoote hati kuriyo nikuhwa. Nitukireeba buri hantu, okukora kw'amaani okw'aha muheru. Obutumwa bubuuriirwe. Buri kintu kyeteekateekire hati, kitegyereize. Ekanisa eteirweho akamanyiso. Ababi bariyo nibeeyongyera kukora eby'obubi. Amakanisa nigeeyongyera kuba agarikufuka. Abarikwera nibairira haihi Ruhanga okukiraho. Ebiconco by'Omwoyo nabitandika kukanya omu bibiina bikye. Turi omu bwire bw'aha muheru. Oo, ninkunda ekyo kyeshongoro eki twabaire tweshongora omu kanisa.

Ntegyereize okwija kw'Ekiro ekyo eky'okushemererwa ky'okutegyeka kwa Kristo kw'emyaka rukumi,

Obu Mukama waitu ohairwe omugisha ariija kandi akatwara Omugore We otegyereize;

Oo, omutima gwangye nigurira, gwiniire eiriho ekiro ekyo ky'okurekurwa kurungi,

Omujuni waitu obu arigaruka omu nsi omurundi ogundi.

Tutegyereize obwire obwo!

31 Hati, omu shuura ya 5 n'emishororongo 5, nitushanga, omu ishomo ryaitu erihweire, ku tugambire ahari ogwo Munyabuzaare Omucunguzi, eki tushangire ngu akaba ari Kristo. Tukishushaniriize na Ruusi: Ruusi naasharamu; Ruusi naahereza; Ruusi naahuumura. Okusharamu, kukaba kuri okwiwhaho orubanja; okuheereza, arikweteekateeka, okwezibwa; okuhuumura, kikaba kiri kuba n'Omwoyo Orikwera, okuhitsya obu Kyakiro y'Obugyenyi bw'okugaitwa eraije. Ka ni kirungi!

Ekanisa ekaija kurabira omuri John Wesley, okwiwhaho orubanja, nari . . . Martin Luther, okwiwhaho orubanja; kurabira omuri John Wesley, okwezibwa; kurabira omu Bapentekoote, okubatizibwa kw'Omwoyo Orikwera; reero hati, ehuumwire etegyereize Okwija kwa Mukama Waayo. Kurungi munonga!

Omunyabuzaare Omucunguzi waitu, abakuru bakaba bahikire obu Baamweta Omwana gw'Entaama, ari haihi kuba Entare, nk'omuramuzi. Akaba ari Omwana gw'Entaama, nimumanya, aine Ekitabo kikomirwe n'obumanyiso mushanju. Ekitabo ku kyatweirwe, omurimo gw'obuteerani gukahwa.

32 Hati, omu shuura ya 3, Ekanisa ekaba etweirwe, kwonka hati obucunguzi n'obw'okushuuuruwa, oku Ekanisa yaacungura-yaacungwirwe, okushuuuruwa kw'ebiyabaireho omu busingye bw'Ekanisa. Mwareeba, Ekanisa yaagyenzire, n'ahabw'ekyo hati Naayoreka, omu shuura ya 5, oku Yaakikozire, n'enki ekyabaireho, oku Yaateire akamanyiso aha Kanisa. Okushuuuruwa kw'Eiziina Rye; okubatiza omu maizi, neekoresa Eiziina Rye; Amagara Agatahwaho; tihariho okuzimu Etahwaho; oruzaaro rw'enjoka; Oburinzi Obutahwaho; enyegyesa zoona enkuru, okutooranwa ira, okw'Ekanisa, okwashuuruuriirwe Ekanisa. Naayoreka oku Yaakikozire.

33 Hati, Omunyabuzaare waitu yaaheebwa Ekitabo ekikomirwe n'obumanyiso Mushanju ky'Obucunguzi kuruga ahari Nyinakyo ow'okubanza. Amiina! N'oha obaire, nitureeba, obaire ari Nyinakyo ow'okubanza? Ruhanga Wenyini. "Kandi Omwana gw'Entaama yaija kandi yaiha Ekitabo omu mukono gwa buryo gw'Ogwo oshutami aha kitebe ky'Obukama." Omwana gw'Entaama akaba ari oha? Omucunguzi, Omunyabuzaare waitu Omucunguzi, Omunyabuzaare aha Kanisa, Owaizire kandi akacungura Israeli.

Hati ekyo nituza kukitaahamu akasheeshe aka. Israeli ekacungurwa, kwonka tikurabakwatsireho, 'habw'okuba Bakamwanga. Kwonka, Ekanisa ekatunga obucunguzi bwayo, kandi n'Omunyabuzaare waitu Omucunguzi. Nk'oku Boazi yaabaire naateekwa kucungura Naomi, okwenda ngu atungye Ruusi, Omumoabu, omugyenyi, Omunyamahanga; nikwo Kristo yaacungwire Isreali, yaakora obucunguzi, reero yaayangwa.

34 Nimwijuka okusaasira, ku omushaija yaateirwe amasasi, oku bumwe n'obumwe ngamba? Omu rutaro rw'omunda y'eihanga, obu . . . Akaba ari omushaija murungi. Akaba ataine rubanja, kwonka baamushanga aine orubanja. N'obu kiraabe, akaba aine orubanja omu muringo, ngu akahunga omu bwire bw'okurwana. Mbwenu bakamushanga aine orubanja kandi bakaba nibaza kumuteera amasasi. Reero omuntu yaaza owa Purezidenti Lincoln kandi yaagira ati, "Omw. Lincoln, ogu n'omushaija Omukristaayo. Yaatiinire. Ogwo mwojo, nimmanya abantu be. Yaagizire obwoba kwonka. Tagyendereire kukora kubi. Yaahungire." Yaagira ati, "Omw. Lincoln, kiri omu mikono yaawe. Niiwe wenka orikubaasa kumusaasira."

Omw. Lincoln yaakwata orupapura n'ekaraamu ye, reero yaataho omukono ati, "Yaasaasirwa," ogu Nanka na nanka. "Abraham Lincoln."

Yaagarukayo aha kihome nairuka, reero yaagira ati, "Nkiki hanu, nyine okusaasirwa kwawe."

35 Reero omushaija yaagira ati, "Niinyanga n'okukireebaho. Kikaagizire akamanyiso kahango. Kikaabaire buri kintu. Noogyezaho kumpindura eky'okushungwa kwonka. Tari Abraham Lincoln. Omuntu weena naabaasa kutaho eiziina rye. Kwonka kikaabaire nikiteekwa kuhandiikwa n'okuhamibwa akamanyiso ke, n'ebindi nk'ebyo, ku kiraabe nikiruga ahariwe." Reero omushaija yaamweshengyereza; n'obu omushaija ori omu kihome yaateekateekire ngu akaba naazaana, kandi yaayegyendera yaarugaho.

Akasheeshe akaakuratsireho, akateerwa amasasi. Reero bwanyima ku yaaherize kuteerwa amasasi, bwanyima haabaho omushango omu kooti enkuru, ahabw'okuba Abraham Lincoln, eshaaha makumi abiri na ina ogwo mushaija atakateirwe amasasi, akataho omukono n'eiziina rye ngu omushaija ogu yaasaasirwa. Kandi bwanyima Gavumenti yaamuteera amasasi, n'obu kiraabe. Mbwenu niki? N'ahabw'ekyo kooti enkuru za Amerika zaagira, zaahika aha kusharamu oku kwa kooti Enkuru, zaagira ziti, "Okusaasirwa tikuri okusaasirwa shana kwayakiirwa nk'okusaasirwa."

36 Na Yesu akacungura Israeli ahari Gologosa. Kwonka kukaba kutari okusaasirwa aharibo, ahabw'okuba tibarakwakiriire nk'okusaasirwa. Kwonka, omu ishomo ryaitu hati ahari ezi saabiiti makumi mushanju, nitushanga ngu nibagaruka kandi batunga okusaasirwa kwabo. Kwonka, Akacungura Ekanisa, n'ahabw'ekyo tusaasiirwe ahabw'okuba twakiriire Eshagama ya Yesu Kristo nk'okusaasirwa kwaitu.

37 Hati, nitushanga ngu Akaba ari Omunyabuzaare waitu Omucunguzi, kandi akaia Ekitabo omu mukono gwa Nyinakyo ow'okubanza. Ni ekyapa ky'obucunguzi. Ekyo tukiboine. Nimwijuka eishomo? Ni ekyapa ky'obucunguzi. Ni ekyapa ekyabandize kikwataine nabwo, ku Ruhanga akeetaagisa amagara ahabwa rufu, omu kibanja kya Edeni. Bwanyima, Yesu, Ogwo ohikiriire, yaafa kandi yaakwata ekyapa, reero yaabaasa kubambuura Obumanyiso, okushuuruura ebyabaire Biburimu; kandi yaaha obuhunguzi, obwabaire buri Obwe, abantu Be. Amagara Agatahwaho, agu Yaahungwire ahabw'okukora ekyo, Akagarura Amagara Ge Ahabwe, ahari Gologosa, reero yaagatugabira kurabira omu Mwoyo Orikwera. Amiina! Tihariho muntu (na kakye) orabaasize kuhika nangwa n'aha kuteekateeka ahari rukundo egyo eki yaabaire eri, eki Yaakozire!

Sitaane, owaabaire rimwe ariwe mukama waakyo ahabw'okugwa omu kibanja, akomirwe kandi yaanagwa omu Nyanja y'Omuriro. Ebiro bye bihweire.

38 Yesu, omu Ngiri, akaba aine ebyeterero bina. Ebyo tubikwatsire. Omwana wa Daudi, omuhunguzi w'Ekitibe ky'obukama; Omwana wa Abrahamu, omugabe ohairwe; Omwana w'omuntu, omuhunguzi w'ensi; Omwana wa Ruhanga, omuhunguzi w'ebintu byona. Omugabe ohairwe!

Omukama eya Ira, ebintu bikaba bitarikubaasa-bitarikubaasa kubiikwa, kurenza emyaka makumi ataano. Tibyakubaasize kumarirwaho kimwe ahari mukama waabyo ow'okubanza kureka emyaka makumi ataano yaahwaho. Reero aha kiro kya makumi ana Akashashura omuhendo. Aha kiro kya makumi ataano, obucunguzi n'amaani ebyabaire biri eby'Ekyanisa, ebyabaire bibuzire omu kibanja kya Edeni, bikacungurwa byagarurwa, kandi byatwohererezibwa ahabw'okubatizibwa kw'Omwoyo Orikwera, aha kiro kya makumi ataano.

39 Bwanyima tukwatsire eki, omuzingo gw'ekitabo. Tukwatsire emizingo y'ebitabo, oku omuzingo gw'ekitabo ogu gwahairwe omu mukono Gwe. Oku ngu Yeremia, omuri Yeremia 32:6, muzaara we, Hanameeli, yaatsigirwe obuhunguzi. Kandi bakaba nibaza omu bukwatwa. Obu, turikuzamu, nawe, akasheeshe aka: obukwatwa. Kandi bukaba bubiikirwe omu rwabya orumburwe omu itaka; nikyoreka ahu amaani ga Ruhanga, n'emizingo y'ebitabo kandi n'enaama za Ruhanga, zimanyirwa, omu mutima. Puraani yaitu y'obucunguzi, nikyo kimwe ebiikirwe omu nyabya z'etaka, Eiziina rya Yesu kandi n'okushuuruurirwa.

40 Tushangire ngu eki kikaba kikomirwe n'Obumanyiso Mushanju, kandi buri Kamanyiso kakaba kazingirwre okwehinguririza. Reero okushuuruurirwa ku kwarugireyo, Yaakurura Akamanyiso, kandi aka yaakabohoorora reero yaashoma eki Akamanyiso ako kaagambre. Bwanyima Yaabohoorora akaakurataho, omuzingo gw'ekitabo, kandi yaashoma eki ako Kamanyiso kaagambre. Yaabohoorora akaakurataho, yaakakururayo reero yaareeba eki Akamanyiso ako kaagambre, kandi n'okushuuruurirwa eki kwabaire kuri. Ekyo nikyo buzima eki Obumanyiso bwaitu Mushanju, obu turikuza kutaahamu omu kaanya kakye, nitwesiga, oku buraije kuba. Buri Kamanyiso, kaihwa omu Kitabo, karyazingururwa, kandi ekyo kirayoreka buzima ekyabaireho.

Nitushanga ngu hariho "mushanju," itaano omuri puraani y'obucunguzi. Itaano niyo namba. Mbwenu hariho

zaamushanju itaano; Obumanyiso Mushanju, Emoyo Mushanju, baamaraika mushanju, Enzamba Mushanju, kandi n'obusingye mushanju bw'ekanisa. N'ahabw'ekyo, nimureeba, zaamushanju itaano n'embabazi. Itaano n'embabazi, kandi mushanju n'okuhikiirira. N'ahabw'ekyo nikigyenda gye munonga buzima, mwareeba. Ni kirungi.

41 Nka, buri Kamanyiso akabambwirwe omu Kigambo kya Ruhanga, nikashuuruurira omuntu ogwo ow'obusingye obwo, ni busingye ki obu tutwiremu, omwoyo gw'obusingye obwo, ekanisa y'obusingye obwo. Okushuururwa 10, aha muheru, nitireeba Akamanyiso k'aha muheru ku kaabambwirwe, nitireeba Maraika ayemereire n'ekigyere kimwe akitaire aha nsi, kandi n'ekindi aha Nyanja, aimukize emikono Ye ahaiguru omu Iguru, kandi n'omuhanganzima ahaiguru y'omutwe Gwe, naarahira Ogwo obaho ebiro n'ebiro, ku obwire buhweire, obu Akamanyiso k'aha muheru. Kandi imwe mutegyereze ahu turaahikire omuri obwo Bumanyiso kandi n'okureeba ahu Akamanyiso ako kari. Ahanyima y'okubona ezo saabiiti makumi mushanju, obwo nitireeba ahu Obumanyiso buri, "Obwire buhweire," obucunguzi buhweire, We hati n'Entare kandi Omuramuzi. N'omujuni waawe akasheeshe aka, kwonka ekiro kimwe Naija kuba Omuramuzi waawe.

42 Ogwa 8 okuhitsya ogwa 1 . . . omushororongo gwa 14 gw'eshuura ya 5, nigushuurura obwire bw'okuramya Omwana gw'Entaama, omu Iguru n'omu nsi; Ekitabo kikomirwe obumanyiso mushanju, Omwana gw'Entaama oshemereire, Omunyabuzaare Omucunguzi. Kandi kuruga aha mushororongo gwa 8, kuhitsya ogwa 14, Baamaraike Nibamuramya, abakuru Nibamuramya, Ebihangirwe ebiine amagara Nibimuramya. Kandi na Yohaana Akamuramiza kimwe munonga okuhitsya obu yaagizire ati, "Buri kihangirwe omu Iguru, omu nsi, ahansi y'ensi, kikampurira ningira nti, 'Emigisha, ekitiinisa, obushoboorozi, obwengye, bibe aha Mwana gw'Entaama." N'obwire bw'okuramya Omwana gw'Entaama Omugabe. Hati, Ekanisa egyenzire, mwijukye.

43 Hati ka tubikuure omuri Danieli, n'eshuura ya 9, n'emishororongo ogwa 1 kuhitsya ogwa 3. Reero nituza kushoma ogwa 20 okuhitsya ogwa 27, ahabw'okuba egi n'eshara ya Danieli kwonka. Niinyenda ngu eki mukishome nimukigarukamu, saabiiti yoona, hati, okuhitsya obu muraakitungye.

Omukunda gw'okubanza ogw'omu busingye bwa Dario mwene . . . ow'omu ruganda rw'Abameedi, owaahindukire omugabe w'Abakaludaaya;

Omuri ogwo mwaka gw'okubanza ogw'omu busingye bwe, nyowe Danieli . . . manyira, nkamanyira omu bitabo . . . emyaka ei Yerusaalemu erimara ekasheenywa, ku eri emyaka makumi mushanju, nk'ekigambo kya MUKAMA ekyahanwirwe nabi Yeremia oku kyabaire kiri.

Hati (ekirikukurataho) naata amaisho ahari Mukama Ruhanga wangye, nimmusherurira omu kushaba n'okweshengyereza, naayesiibyakwo njwaire ebiguniya, nyesiigire eiju.

. . . naashaba MUKAMA . . . Ruhanga, naamwaturira, . . .

Kandi naagumizamu agyenda omumaisho, okuhitsya hati obu turikuhika aha mushororongo gwa 20.

44 Okutamara obwire, abantu beemereire, niinyenda ngu muhikye aha gwa 20, okuhitsya obu turaahikye hati aha-aha mushororongo gwa 20.

(Kandi) ku naabaire ninkigamba kandi ninkishaba, niinyatura ebibi byangye n'ebi'abantu bangye Abaisraeli, nindeetera MUKAMA Ruhanga wangye okweshengyereza kwangye ahabw'orushozi rwa Ruhanga wangye orurikwera;

Ninkigamba ninshaba, omushaija Gaburieli, ou naareebire omu kworekwa kw'okubanza, yaagaruka, yaija naayehuuta, yampikaho (nk'omu bwire bw'empongan y'omu mwabazyo).

Yanshoboororera naagira ati: Iwe Danieli, hati naija kukuha obwengye n'okwetegyereza.

Nangwa shi kuri twabaire turiyo! Akamushanga ari ata? Omu kushaba.

Maraika, "omushaija." Mwetegyereze, Akamweta, "omushaija." Kandi ahabw'okuba owa . . .

Obu waaba nootandika kweshengyereza, haija ekigambo (kandi kikaija ngu agyende); mbwenu naija kukikugambira, ahakuba ori orikukundwa munonga. Ku . . . n'ahabw'ekyo teekateeka ahari ekyo kigambo, oyetegyereze okwo kworekwa.

Saabiiiti makumi mushanju ziteirweho ahabw'abantu baawe n'orurembo rwawe orurikwera, nari orurembo rwawe, ngu ebicumuro bihwe, . . . ekibi kiihweho, okutahikiirira kurihiirirwe, n'okureeta okuhikiirira okutarihwaho, ebyorekirwe n'ebahanwirwe baanabi biteebweho akamanyiso, n'aharikwera munonga hashukweho amajuta.

Nzizo aho enshonga mukaaga z'okwija Kwe. Hati mwetegyereze.

Hati, n'ahabw'ekyo, mbwenu, omanye kandi oyetegyereze, (hati muhurikize) ngu okwiha aha kiragiro ky'okuhunduura n'okwombeka Yerusaalemu okuhitsya . . . (Mesia) Omunyiginya owaashukirweho amajuta, haryabaho saabiiti (makumi mukaaga na mwenda . . . Enguuto n'enteeraniro zaazo zigarukye zombekwe, kandi

n'engo z'amabaare), kwonka bikorwe omu biro by'emirabanamu.

... ezo saabiiti makumi mukaaga na ibiri ku zirihwaho, (Mesia) Owaashukirweho amajuta aryaihwaho, kwonka (atari ahabwe). (Kandi) abantu b'omutegyeki oriija-omutegyeki oriija ... (bacwekyereze) orurembo n'Omwanya ogurikwera; (kandi) omuheru gwe guryaba okutwarwa omwegyemure; ... habeho obweme okuhitsya aha muheru. Eby'okuhwerekyereza biragiirwe.

(Kandi) ogwo mutegyeki aryaragaana (muhurikize) na baangi endagaano ehamire, emare saabiiti emwe, emwe y'ezi saabiiti makumi mushanju. Kandi omu kicweka ky'okubanza ky'egyo saabiiti aryazibira abantu kutamba ebitambo n'o ... kuhonga empongan. Bwanyima omuhwerekyerezi aryaizira aha ipapa ry'ebirikuzira, okuhitsya obu omuheru gwe ogwaragiiwe gurimuhikaho.

45 Hati, ndiryo aho eishomo ryaitu ahabw'enteerane ishatu, ina, itaano ezirikukurataho, kyona eki Mukama araije kushuuura. "Saabiiti makumi mushanju."

Hati, ninza kushaba Doc, ku araabe naakunda, ekiro eki, okutaho orubaaho rwangye aho, kugira ngu mbaase kuzitaho. Tindikwenda ngu muzifeerwe. Hati nimuteekwa kwega hamwe naanye, kandi mwegyere kimwe munonga, kitari kityo nimwija kuzifeerwa. Mbwenu niinyenda kuziteera ekishushani n'engaro aha rubaaho hanu, reero mureete ekaraamu zaanyu n'orupapura kandi muhandiikye ebi biro, obu bunaku, na byona ebizikwatsireho.

Hati, saabiiti makumi mushanju nizitandika (hati mutungye eki) ahanyima y'Ekanisa kwihiwaho. Hati, weena orikwetegyereza ekyo, agire ati, "Amiina." [Abateeraine baagira bat, "Amiina." -Omur.] Hati, ahanyima y'Ekanisa kwihiwaho.

46 Okushuururwa 6:1, okuhitsya Okushuururwa 19:21, nihakwatanisa n'ezo saabiiti makumi mushanju, n'ahabw'ekyo nituteekwa kwemerera kandi tushoboorore, tutakagyenzire hare. Nituteekwa kwemerera kandi tushoboorore ahabw'enki saabiiti ezi makumi mushanju. Habw'okuba, waaba otakikozire, noija kufeerwa obwo Bumanyiso, noija kufeerwa ezo Nzamba, noija kufeerwa ezo Nyabya, ebyo Bibonaboneso, egyo myoyo eshatu etashemeire eri nk'ebikyere, ebyo Bibonaboneso bishatu, okunagwa aheeru kw'ekijoka ekirikutukura, omukazi omu izooba. Noija kubifeerwa byona, ku oraabe otabimanyire, ahabw'okuba nibibeeraho hanu honyini omuri egi saabiiti ya makumi mushanju. Aho niho birikubeeraho.

47 Hati, nabi Danieli akaba ari omuri Babulooni kumara emyaka makumi mukaaga na munaana. Imwe abarikwenda kukijuriza okwo enyima, kandi mutamare obwire bwanyu, ekyo kinyetaagiise ku-kukisherura. Emyaka makumi mukaaga! Akaza omu bukwatwa omu gwa 606 B.C, kandi okworekwa obu kumwizira gukaba gurigukaba guri ogwa 538 B.C. 538 waaziiha ahari 606, nihatsigara makumi mukaaga na munaana. Akaba ari omuri Babulooni emyaka makumi mukaaga na munaana, omu bantu abatarikumanya Ruhanga, kandi nabwo akaba aine obusinguzi. Amiina. Titurikubaasa kumara n'eshaaha emwe.

Kwonka akaba ari rwagati honyini, hatariho ondijo kureka bagyenzi be bashatu, kandi nabo bari omu bicweka bitari bimwe by'omu bugabe. Kwonka, Danieli, ayemereire wenka na Ruhanga, akagumya obusinguzi kumara emyaka makumi mukaaga na munaana. Mukiteekatekyeho! Tindikwenda kutandika kubuurira, ahabw'okuba obu bushemereire kuba Obutumwa bw'okwegyesa. Kwonka, emyaka makumi mukaaga na munaana, akaba arinzire obusinguzi kandi akaba ateeshiishire, omumaisho ga Ruhanga; hatariho kubatizibwa kw'Omwoyo Orikwera, hatariho Shagma ya Yesu Kristo y'okumutonganirira; hariho eshagama y'enimi yonka, n'embuzi, n'enyana z'eruusi, ebi yaabaire atamba omu mubonano, ahabw'emigyenko y'abantu abatamanya Ruhanga b'egyo nsi. Bakaba batweirwe eifo okwo. Yeremia akabaraguraho, ngu baryaza eifo okwo.

48 Hati, Danieli, oo, mugyenzi, akaba atandikire kureeba ngu obwire bukaba butandikire kwirira haihi, nk'oku naitwe turi ebiro ebi. Danieli akatandika "kwetegyereza," yaagira ati, "ahabw'okushoma ebitabo."

(Kandi) omuri ogwo mwaka gw'okubanza ogw'omu busingye bwe, ... Danieli ... omu busingye nyowe Danieli nkamanyira omu bitabo (omubaro gw'e) ... emyaka ei Yerusaalemu erimara ... ekasheenewa, ku eri emyaka makumi mushanju, n'ahabw'ekyo ... ekigambo kya MUKAMA ekyahanwirwe nabi Yeremia oku kyabaire kiri .

Yeremia, omu gwa 606 B.C, akahanuura, ahabw'ebibi byabo n'okutatiina Ruhanga, ku baabaire nibaza kumarayo emyaka makumi mushanju.

49 Nimwijuka, hakaba hariho nabi ondijo owaimukireho omu biro ebyo. Tindikubaasa kwijuka eiziina rye omu bwire obu. Obundi nimbaasa kuriijuka ahabwanyu omu-omu dakiika nkye, ku naakuranzya enyima ahabw'akaanya kakye. Kwonka akarugayo kandi yaagira ati, "Yeremia, ogwire. Ruhanga naaza kureka Israeli eifo okwo kumara nk'ebiro bityo byonka, kumara nka bingi, nk'emyaka ebiri."

Yeremia yaagira ati, "Kibe kityo. Amiina." Yaagira ati, "Kwonka rindaho edakiika emwe. Ka nyowe naiwe tucondooze hamwe, nka baanabi." Yaagira ati, "Ijuka, hariho abo abaatubandiize kuhanuura, kandi baagamba ebintu ebyabaire bitahikire. Kandi Ruhanga akabahana ahabw'okugamba ebintu by'ebishuba. N'ahabw'ekyo, ka tube n'obuhame. Kwonka Mukama Ruhanga angambiire ngu hakiriyo emyaka makumi mushanju etsigaire."

Ruhanga akateera nabi w'ebishuba ogwo, kandi yaamwita omu mwaka ogwo, ahabw'okuba Ruhanga akaba agambiire nabi ogu ow'amazima ku haabaire hariyo emyaka makumi mushanju.

50 Kandi niinyenda ngu mwetegyereze oku Danieli, kandi obwo ari omugyenzi, kandi obwo abingirwe kuruga omu bantu be, abingirwe kuruga omu kanisa ye, hatariho saaviisi y'ekanisa n'emwe, hatariho kanisa yoona y'okuzamu, hatariho byeshongoro byona by'okweshongora kureka ebi yaabaire ayeshongora we wenka, rwagati y'ebi byona, nabwo akaguma ahamiire aha bi nabi ogwo yaagambire. Amiina! Amiina!

Hatariho kanisa y'okuzamu, hatariho muntu n'omwe w'okukwatanisa nawe; buri muntu akaba aza omuri hekalu z'abantu abatamanya Ruhanga, buri bantu bakaba baramya ebishushani byabo ebirikuramibwa. Hatariho byeshongoro by'Elikristaayo; hatariho n'omwe owaabaire naikiriza ekintu nikyo kimwe nk'eki yaabaire naikiriza. Kwonka omu myaka makumi mukaaga na munaana, kuruga obu yaabaire ari omutsigazi nk'ow'emyaka ikumi na ibiri, ikumi na ina y'obukuru, obu yaatwarwa eifo okwo, akaguma ari omwesigwa ahari Ruhanga; kandi yaamanya okuruga ahari nabi Yeremia ku ebiro byabaire biri haihi kuhika.

Ekyo ka kyakutagasize omutima gwa nabi wa Ruhanga weena ow'amazima ebiro ebi, ngu turanzye enyima reero tureebe eki nabi w'amazima ogu yaagambire, kandi n'okumanya ngu turi omu bwire bw'aha muheru.

Akagira ati, "Nkamanya okuruga omu bitabo ku Yeremia, ow'eishe-emwe mugyenzi wangye, emyaka mingi, mingi ehwiringire, akahanuura ngu Israeli ekaba neeza kuguma hanu emyaka makumi mushanju. Kandi obwire obwo buri haihi kuhika." Reero yaayeteekateeka. Reero yaarangirira okwesiibyakwo, kandi yaayeyeza, kandi ku . . . eiju n'ekiguniya, kandi yaakijwara omu mutwe, reero yaaza omu kwesiibyakwo n'okushaba, okumanya ebikwatsire aha biro ebi baabaire batwiremu.

51 Kandi Danieli ku araabe, nabi wa Mukama, yaabaasize kwehanuuza omu bitabo bya Yeremia, kandi kikamuhitsya omu mwanya nk'ogwo; ngu nangwa na Israeli erikurugayo, boona bahuriire, bakaba nibaruga omuri Babulooni, kuza omu nsi y'obutaaho, kyabaire nikimureetera okwesiibyakwo ayesiigire eiju n'ebiguniya. Ekanisa ya Ruhanga ohuriire ka yaakushemereire kukikora munonga n'okukiraho, okumanya ngu obwire buriyo nibutuuba kandi tiburigaruka kubaho bundi; kandi n'Okwija kwa Mukama Yesu Kristo, n'Okutegyeka kwa Kristo kw'emyaka rukumi okukuru kuri haihi kutaahamu! Nitubaasa tuta kushiisha obwire, nituteera zaara, aha bidiba by'okwogyeramu aha Sande, tutainiire Mukama obwire? Kuzayo kwonka . . . Kuri omuriisa agamba aha kintu ekindi eki otarikwenda, noimuka kandi oshohora. Kandi ku e-ekanisa yaamaraho obwire buraingwa, ahabw'enki, no-no, nota-nootamwa. Mureebe mbeera zaitu. Mureebe eki turiyo nitukora.

Gyeragyeranisa amagara gaitu n'aga nabi ogwo. Omuntu omwe omu bugabe bwona, hatariho kanisa y'okuteeraniram, kandi hatariho n'emwe ahandi hoona ey'okuteeraniram. Ekaba esheeniyirwe kandi eyokiibwe; orurembo rwe, abantu be bakaba bari enkwatwa. Emyaka makumi mukaaga na munaana! Makumi mukaaga na munaana, makumi mukaaga na mwenda, makumi mushanju; akaba atsigaize emyaka ebiri.

52 N'ahabw'ekyo ku yaatandikire kushoma omu kitabo n'okureeeba ku obwire bwabaire nibwirira haihi kuhikiirira, okuhikiirira, akasherura Ruhanga omu kushaba, okugira ngu amanyi ebirikukwataho.

Ka n'obwire! Nitukora ki? Kunu, "Amahanga nigeecwamu ebicweka; enyanja neehoorera; abantu bahahaize emitima ahabw'obwoba; obwire bw'okushoberwa." Ebintu ebi byona, ebirikuranga akabi akarikwenda kubaho. Okushoroora omu nganda; obubi bw'emiringo yoona oburikugyenda omumaisho omu nsi; n'empaka, n'okurwana, n'ebitaine mutambo. Kandi n'ebyma by'orutaro nibizeereera omu mabiikiro gaabyo, ngu eihanga rimwe rikye eririkwingana obuhango bw'ehanga rya Cuba haifo hanu niribaasa kucwekyereza ensi omu dakiika ikumi. Kandi bo nibateera empaka, abantu abatarikutiina Ruhanga kandi batarikukumanya n'amaani Ge.

Kandi Omwoyo Orikweru omu Kanisa, naakorera omu Ntoore, Arikweyoreka ahuriire ahanyima y'emyaka enkumi ibiri, ku Niwe otahinduka oku abaire ari nyomwabazyo, n'eriizooba nikwo ari, kandi nikwo ariguma ebiro byona. Nitubaasa tuta kushutama n'obweremwa? Nitubaasa tuta kufa kukiraba ahaiguru? N'obwire obu twakubaire nitwecondooza, tutegyereize obwire obwo obukuru oburikwija.

53 Hati, akashoma omuri Yeremia, eshuura ya 25. Ka tubikuure omuri Yeremia, eshuura ya 25, reero tushome ebi Yeremia yaagambire. Buzima, ka tutandiikire aha mushororongo gwa 8, 'habw'okuba ni . . . Niinyenda buzima mukikwate. Omushororongo gwa 11 niho mbaire mpandiikire hanu kushoma, kwonka ka tutandikire aha mushororongo gwa 8.

Nikyo MUKAMA ow'amahe arikugirira ati: . . .

Buzima ekyo ninkikunda. Ku naakubaasa kuhurira nabi arikwemerera na OKU NIKWO MUKAMA RUHANGA ARIKUGIRA, ow'eishe-emwe, nikyo ekyo. Ahariinye, ekyo nikimara. Nikyo ekyo kyona.

. . . MUKAMA ow'amahe arikugirira ati: Ahabw'okwanga kworobera ebigambo byangye,

Reeba, niinyija kutuma aha nganda zonna ez'aha bukiizi-bwa-bumosh, nikwo MUKAMA arikugira, n'aha mwiru wangye Nebukadeneesa omugabe wa Babulooni, baije, mboohereze kuteera egi nsi n'abatuuzi baamwo, n'amahanga aga goona agabeehinguririize. Kandi Ndyabacwekyerereza kimwe, . . .

Mwijukye, abo bakaba bari entoore za Ruhanga abu ariyo Naagambaho. Abo bakaba batari bakaafiiri. Abo bakaba bari baamemba b'ekanisa.

Kandi ndyabamaramu eiraka ry'okwesiima . . . eiraka ry'okushemererwa, (nk'oku turi nabyo ebiro ebi, okuzina ebidandari kwona, Ricky na Elvis,) kandi, oo, eiraka rya kishwera, . . . eiraka ry'enyonyi . . . nari, erya kishwerwa, nimmanyisa, eiraka ry'orubengo, . . . okwaka kwetabaaza.

(Kandi) egi nsi yoona eryaba amatongo, . . .

Muhurire nabi ogwo naagamba n'eiraka rihangi ati, "Egi nsi yoona eryaba amatongo!" Kandi kutarikutooreza omuheereza mukuru ogu wa Ruhanga, kureka nindagura nti eihanga eri ryona riryaba amatongo. Ruhanga aryafubira eihanga eri ahabw'ebibi byaryo. Ruhanga ku araabe atararekire Israeli entoore Ze, Oruzaaro rwa Abrahamu, ou Yaakozire nawe endagaano kandi n'okuragaanisa, ku Araabe atarabarekire batafubiirwe ahabw'okukora ebibi; n'obu baabaire bari abanyadiini kashushu, baine amakanisa rugogoma, kandi n'abanyamurwa, na baarabi; kwonka ahabw'emicie mibi n'ebintu ahagati yaabo, Ruhanga akatuma baashaaruura ebi baabibire, nikwo naitwe turikitunga. Omushororongo gwa 11.

. . . egi nsi yoona eryahinduka amatongo, kandi . . . (ekirikutangaaza;) . . .

Okwo n'okugira ngu, buri muntu naareeba reero agira ati, "Mbabo aho. Bakaba bari ab'amaani munonga. Bareebe hati."

. . . kandi ago mahanga garyamara emyaka makumi mushanju nigheereza omugabe wa Babulooni.

Obwo n'obwire bwona bw'amagara g'omuntu. Obwo n'obu omukaikuru waawe, omukaikuru ohairwe omugisha yaabaire ari omwerere. Bakaba bariyo bataine Ruhanga, hatariyo kanisa, bataine kyeshongoro, bataine kintu kyona, kumara obusingye obwo bwona, okuhitsya obu obusingye obwo obwakozire ebibi bwafire bukahwaho.

Bwanyima egoy myaka makumi mushanju ku erihwa, ndyafubira omugabe wa Babulooni n'eryo ihanga, n'ensi y'Abakaludaaya, nimbatura eby'okushiisha byabo, mpagire eihamba ebiro byona; nikwo MUKAMA arikugira.

Kandi ndyareeta aha nsi egoy ebigambo byona ebi naagigambireho, ebihandiikirwe omuri eki kitabo eky'ebi Yeremia yaahanwire aha mahanga goona.

Ahabw'okuba amahanga maingi n'abagabe b'amaani baryabahindura aba-abahuuku; ntyo mbazimuuri ebirikwingana n'ebi baakozire, kandi nk'emirimo y'emikono yaabo oku eri.

Oku nikwo MUKAMA, Ruhanga wa Israeli, yangambiire naagira ati: Twara eki kikopo kya viinyo y'ekiniga ekiri omu ngaro zangye, okinywaise amahanga goona, agu ndikukutumaho.

Om u bindi bigambo, ati "Yeremia, Naakuha obutumwa obu. Otashutama okatuza. Otaguma omu mwanya gumwe, kureka ohanuirire amahanga goona." Nimukikuratira? [Abateeraine baagira bati, "Amiina." -Omur.] "Hanuurira amahanga goona. Yoreka obumanyiso Bwangye n'ebi'okutangaaza, kandi ka bamanye ku Niinyija kukora eki."

Kandi nigaija kunywa, gagwererane, gagwe eiraro, ahabw'ekigambo eki ndaagooherezemu.

54 Nibakora ki omu kiro eki kyonyini? Nibakweta na-nabi w'ebishuba, bakweta ori-orikufungura Ekigambo, bakweta ori-orikurengesereza omu nyikiriza yaawe, omuragazi, nari omurootsi w'ebirooto, nari omuringo gumwe gw'okumanya ebiri omu biteekateeko. "Baryagwa eiraro!" Kandi ekigambo eiraro, waakishoboorora, nikimanyisa "okushara." "Buzima baryashara, reero bagire bati, 'Aa, mutata omutima ahari ogwo orikwera oyekuringa omu itaka, ogwo mushema,' ahabw'Ekigambo eki Ndibatumaho."

55 Nimureeba ebyafaayo nibyegarukamu? Yeremia takaabaire naikirizana hamwe n'Abafarisayo baabo, Abasadukaayo, aba Herode, abu baakubaire bari boona. We, akafa kushohoza Ekigambo, reero Kyatuma boona baamusharira. Niki? Hati mwetegyereze.

Ntyo naiha ekikopo omu ngaro za MUKAMA, naakinywaisa amahanga goona, . . .

Yeremia taragumire omuka. Yeremia taragumire omu mwanya gumwe mukye, kureka akakinyweisa amahanga goona.

. . . agu MUKAMA yantumaho:

56 Yeremia akatwara Ekigambo kya Mukama, viinyo y'Ekigambo Kye. Kandi viinyo nigo maani g'Ekigambo Kye. Viinyo eine amaani. Viinyo n'ekirikusinza. Viinyo eine amaani enyima yaayo. "Kandi naatwara Ekigambo kya Mukama," Yeremia yaagira ati, "reero Naakyoreka. Viinyo egoy, ago maani Agagirimu, ngoorekire omumaisho gaabo, beitu Tibaagahurira."

Ruhanga yaagira ati, "N'ahabw'ekyo niinyija kuboohereza omuri Babulooni kumarayo emyaka makumi mushanju." Ekyo buzima nikyo Yaakozire. Abahikiriire n'abatahikiriire bakagyenda, boona.

57 Hati, tugarukye aha ishomo. Danieli akaba atwire naashoma. Muteekateekye kwonka. Danieli akashoma ebigambo nibyo bimwe nk'ebi turikushoma akasheeshe aka. Danieli akashoma Baiburi niyo emwe, obumanyiso bw'omu bihandiiko nibwo bumwe, ebibazo nibyo bimwe, ebintu nibyo bimwe ebi ndi, ahabw'okuhwerwa Ruhanga, ndaije kubashomera omu Butumwa bukye oburaakurateho, ekintu nikyo kimwe, okubooreka ku turi omu bwire bw'aha muheru.

Kandi Danieli, naiha Ekigambo omuri Yeremia, akashuuma yaaza Babulooni. Kandi akaba ari nabi oshukirweho amajuta. Kandi akakora eby'amahano, akamanyiso, akaba naabaasa kushoboorora endimi ezitarikumanya, kandi yaakora obumanyiso n'eby'okutangaaza omuribo. Beitu nabwo, ayemereire wenka, ahabwe wenka! Amiina! Akeemerera wenka.

58 Kwonka Yeremia akaba ahendiikire Ebiambo ebi emyaka mingi, mingi enyima. Reero Danieli, naashoboorora ekyo Kigambo, akatunga . . . "Ati, hati rindaho edakiika emwe. Nitwirira haihi obwire bw'aha muheru, ahakuba naaherize kutuura hanu emyaka makumi mukaaga na munaana. Kandi nabi wa Mukaka," amiina, "ow'eishe-emwe mugyenzi wangye, nabi wa Ruhanga w'amazima owaayeyorekire ku ari nabi, akatuhuanuirira. Nkihandiikire hanu omu kitabo, ekyagizire kiti, 'Emyaka makumi mushanju eryahwa.' Ai Mukama Ruhanga, nitwirira haihi n'emperu. Obwo busingye bwona bukafa bwahwaho. Nooza kukora ki hati, Mukama? Okaragaanisa kututumaho . . ." Reero yaayetebeekanisa, kushaba.

59 Ai Ruhanga, ku haraabe harabaireho obwire obu tushemereire kuba nitwetebeekanisa, kushaba, ni hati. Ahakuba, itwe nk'abaheereza Be ab'amazima, nitureeba, ahabw'Ebaruha z'entumwa, ahabw'okurabura kw'Omwoyo Orikwera, ngu turi omu biro eby'aha muheru. Omwoyo Orikwera Naakigamba. "Omu biro by'aha muheru, abantu baryaba engangaazi, abarikwekuza, abarikukunda kweshemeza bonka okukira Ruhanga, abatarikwenda kugarukana n'abandi, abarikubeihererana, abatarikweyangisa, kandi abarikwanga ebirungi." Nimmanyira omu Baruha.

60 Kandi nimmanya ngu haryaija abashekyerezi, omu biro by'aha muheru. Niinyetegyereza ku haryabaho eihanga kuteera erindi ihanga, omu biro by'aha muheru. Niinyetegyereza ngu haryabaho ebingonzi, omu biro by'aha muheru. Niinyetegyereza ngu haryabaho ebikureebwa ebirikutiinisa, nk'endegye z'omu kaabunga ezirikuvugwa baadaimoni, omu kaabunga, ebikureebwa biteetegyerezibwe, kandi n'abantu baryahahahaaza emitima ahabw'obwoba. Haryabaho obwire bw'okushoberwa, kandi n'obusaasi omu bantu. Nkashoma ku boona bariza omu bibiina n'ebigombe by'amadiini, kandi baryagira okweteerana, omu biro by'aha muheru. Niinyetegyereza ngu abakazi baryasharaho amashokye gaabo omu biro by'aha muheru. Niinyetegyereza ngu baryajwara ebijwaro bigufu, kandi batamburire omu nkaito za kakondo, nibarangiza amajugo baaba nibagyenda, omu biro by'aha muheru. Niinyetegyereza ngu omuzimbwe guryaba ahansi munonga omu biro by'aha muheru. Niinyetegyereza ngu ababuurizi baryaba abariisa b'obusyo ab'ebishuba omu biro by'aha muheru, abaraije kufungura Ekigambo, kandi tibaririisa abantu Ekigambo kya Ruhanga, kureka baryakuratira enyikiriza n'ebindi, omu mwanya gw'Ekigambo kya Ruhanga. Kwonka niinyetegyereza ngu haryabaho Eiraka eriryaija omu biro by'aha muheru, nirigambira ahaiguru omu ihamba, niryeta abantu okugaruka aha Butumwa obwabandize, kugaruka aha bintu bya Ruhanga. Niinyetegyereza, ahabw'Ekitabo, ebintu ebyo biryabaho.

61 Niinyetegyereza ngu omu biro by'aha muheru haryabaho enjara. Amakanisa garyayekoreramu kimwe ebibiina by'amadiini, kandi gatebeekane kyarimwe na buri kintu, kuhitsya obu omu biro by'aha muheru haryaija enjara, kandi teriba y'ebi'okurya n'amaizi kusha, kureka ahabw'okuhurira Ekigambo kya Ruhanga eky'amazima. Kandi abantu baryaruga burugwa-izooba, burengyerwa-izooba, barugye bukiizi-bwa-bumosho, kandi na bukiizi-bwa-buryo, nibasherura kuhurira Ekigambo kya Ruhanga eky'amazima. Kwonka amakanisa garyayekoreramu kimwe ebibiina by'amadiini kandi gagume munonga, kuhitsya obu gariremwa Kukihurira. Ekyo ninkyetegyereza ahabw'Ebitabo. Kwonka, omu biro ebyo, Ai Ruhanga, haryabaho Eitaagi eriryaimuka kuruga omuri Daudi.

Niinyetegyereza ngu Aryatuma Eliya ekiro ekyo kitakahikire omu bwire bw'aha muheru, kandi aryagira Obutumwa oburihindura emitima y'abaana ekagarukana n'ey'abazaire, bubagarure enyima aha byabandize, bagarukye enyima aha muheru, reero batandikye. Niinyetegyereza ngu ekyo kiryabaho Omwoyo atakatsigireho ekanisa y'Abanyamahanga, kugarukira Abayudaaya.

62 Kandi tindikwetegyereza ebi aha bw'Ebaruha kwonka. Niinyetegyereza ahabw'Ekigambo, ahabw'Ekigambo ekyahandiikirwe, ku Abaisraeli baryagaruka omu nsi yaabo y'obutaaho; Kandi nimbareeba nibagarukayo.

Niinyetegyereza ahabw'Amabaruha ga baanabi, ku Israeli eriba eihanga. Baryagaruka batandikyeho kuramiza omuri hekalu. Ruhanga aryatandika kukoragana nawe omurundi ogundi ku araahikye omu nsi ye y'obutaaho. Oo! Baanabi babiri baryaimukaho omu biro by'aha muheru, hamwe nabo. Ekyo ninkyetegyereza. Ahonaaho Ekanisa y'Abanyamahanga yaaba neerugaho eti, baanabi babiri baryaija, Elisa na Musa, ahari Israeli. Nituza kukyetegyereza twaba nitukirabamu.

Nabi akareeba obwire buri haihi kuhikiirira eifo okwo omuri Babulooni. Ni Kirungi.

63 Gaburieli naareebeka, okushuuruura bitari ebyo byonka ebi yaabaire naabuuza, kureka kumugambira ebyo byona ebyaragiriirwe ahabw'ehianga ry'Abayudaaya, kugumirizamu kimwe kuhitsya aha muheru. Amiina! Akabuuzaho kakye munonga, reero yaakitunga kyona. Akafa kubuuza kumanya . . .

Danieli akaba naagyezaho kumanya, "Hati hatsigaireyo obwire oburikwingana ki, Mukama, kikabaho? Yeremia nabi, omuheereza Waawe, ow'eishe-emwe mugyenzi wangye, akahanuura emyaka makumi mukaaga na munaana ehwire, kandi yaagira ati, 'hariho emyaka makumi mushanju ei abantu aba barimara hanu.' Obusingye obwa ira bwona haihi buhweireho hati."

64 Hariho obusingye bwa ira bw'Abapentekoote obwaimukireho, emyaka makumi ana ehwire. "Abarwani aba ira," nikwo baabaire nibeetwa. Bakeekoramu ekibiina ky'ediini, reero baarwana, kandi baatongana, omuhanda gwona kuraba aha Rushozi Horebu na Nebo, okuraba okwo hoona. Kwonka, aha muheru, turi aha mugyera hati. Naaza kwimutsya obusingye obusya, obwine Yoshua ow'okubwambusya. Ekiragiro kikaremwa; Musa akagyenda nakyo; Musa akaremwa. Yoshua yaabwambusya seeri. Nitushanga ngu ebibiina by'amadiini biremirwe, kwonka Omwoyo wa Ruhanga . . . Yoshua, ekigambo Yoshua, nikimanyisa "Yesu Omujuni waitu." Ngu, Omwoyo Orikwera naija kutaaha omu Kanisa. Ti kibiina ky'ediini, kureka Omwoyo Orikwera aryaza omu bantu reero Abaretere kwetebeekanisiza okutwarwa, okwambuka Yorudaani. Niinyetegyereza ahabw'okushoma Ebitabo ku ekyo nikyo kirikwenda kubaho. Kandi Ruhanga naamanya ngu ekyo nikyo ndikusherura hati, kugira ngu mbone kuhuumuriza abantu Be kandi mbagambire ebiri haihi kuhikiirira bombi abari hanu akasheeshe aka, kandi n'abari aheeru okwo okubuga ensi ei entambi z'amaraka ezi zirihika, omu nsi yoona, ku turi omu bwire bw'aha muheru.

65 Akashuuura obwire bwona okuhitsya obu Obukama burigarurirwa kimwe busya reero Okutegyeka kwa Kristo kw'emyaka rukumi kukatandika. Obwo nibwo bwabaire buri obutumwa bwa Gaburieli. Akagira ati, "Naija kukugambira ku hariho emyaka makumi mushanju, saabiiti makumi mushanju, nabwo, eziteirweho ahabw'abantu baawe, ziteirweho kuhitsya aha muheru gw'obusingye bw'Abayudaaya. Hariho saabiiti makumi mushanju." Hati mureebe eki Yaagambire. Ngu hati, kuruga aha kiragiro ky'okuhunduura . . .

Saabiiti makumi mushanju ziteirweho ahabw'abantu baawe n'orurembo . . . rwawe, . . .

"Orurembo rwawe." Babulooni rukaba rutari rurembo rwe. N'oha . . . Orurembo rwe rukaba rurahi? Yerusaalemu.

66 Hati, ku turaahikye ahari mu-mushanju, nari okuhamibwa kw'emirundi mukaaga, nitwija kureeba eki orurembo orwo ruri, reero turureete turushuumye kandi tuhamye ou rwabaire ruri, owaarutandikire n'oha, n'ahu rwarugire. Ruryamara obwire burikwingana ki? Ruryagaruka rwombekwe omurundi ogundi? Omu bunaku ki? Oo, ebintu bikuru bitubiikiirwe. Ni Kirungi.

Saabiiti makumi mushanju ziteirweho ahabw'abantu baawe n'orurembo . . . rwawe, ngu ebicumuro bihwe, . . .

Hati, Taragizire ati, "Danieli . . ." Tihariho kubangaanisa kureka Akamugambira ngu saabiiti makumi mushanju zikaba ziri . . . Nimmanyisa, emyaka makumi mushanju ekaba eri haihi kuhwa. Makumi mukaaga na munaana, hakaba hatsigaire emyaka ebiri yonka. Kandi nitushanga ngu obunabi bwa Yeremia bukahikiirira gye buzima. Ahanyima y'emyaka ebiri, bakarugayo. Nehemia akagyenda kandi yaatunga ekiragiro kuruga aha mugabe, kandi yaayombeka ekisiika omu bwire bw'okurabanamu. Bakakora emirimo. Akagira ati, "Ekisiika . . ." Muhurikize eki.

. . . ebicumuro bihwe, . . . ebibi biihweho, . . .

"Ebibi biihweho." Ahari baahi? Abayudaaya. "Ziteirweho ahabw'abantu baawe," t'ahabw'Abanyamahanga. "Ahabw'abantu baawe," Abayudaaya. "N'orurembo rwawe," ti New York, ti Boston, Filadelufia, Chicago, Loss Angeles, Rooma. Kureka, "N'orurembo rwawe," Yerusaalemu.

. . . kandi ebicumuro bihwe, ebibi biihweho, . . . okutahikiirira kurihiirirwe, (n'okureeta) okuhikiirira okutarihwaho, ebyorekirwe n'ebiyahanwirwe baanabi biteebweho akamanyiso, n'Orikwera munonga ashukweho amajuta. (Mureebe!)

Mbwenu, omanye kandi oyetegyereze, ngu okwiha aha kiragiro ky'okuhunduura (n'okugaruka) kwombeka Yerusaalemu (orwabaire ruri orurembo rwe) okuhistya aha . . . (Mesia) Omunyiginya owaashukirweho amajuta, haryabaho saabiiti (ahari makumi mushanju) mushanju, . . .

67 Mutegyereze kuhistya obu ekyo turaakitaahemu! Oo, mugyensi! Ogwo n'omugisha ogu ndi . . . Naaza kukwata omugoye reero nyekomere aha mwanya hanu.

Akashuuura byona ebiryaija, yaagira ati, "Hati tindikuza kukugambira ngu emyaka egoye ebiri eri haihi kwonka, eryahwa, ehikiirizibwe." Kandi twena nitumanya ngu buzima bakamarayo emyaka makumi mushanju, kandi-kandi baarugayo, buzima kwo nk'eki nabi yaagambire. Kandi Isaaya, nari nimmanyisa . . . Danieli akaikiriza nabi ogwo, n'ahabw'ekyo ngugu akaba ari hanu, ayeteekateekire. Ni kirungi. Kandi aka . . .

Kandi hati, Gaburieli ku yaizire, Yaagira ati, "Naija kukworeka byona, okukushuuuurira ebintu ebi, ebyo, byona kuhitsya aha muheru." Mwareeba? Mureebe.

. . . omuhwerekyerezi aryaizira aha ipapa ry'ebirkuzira, okuhitsya obu omuheru . . .

68 Emperu ni "omuheru gw'ebintu byona." "Naaza kubooreka ebiribaho." Hati muhurikize. Mukikwate! "Nyowe .

. . Danieli, ntumirwe. Nookundwa omu Iguru. Kandi mpuriire eshaara zaawe mbwenu naashuma hati kukugambira ebiteirweho ahabw'Abayudaaya na Yerusaalemu, okuruga hati hati okuhitsya aha muheru gw'emperu, ekintu kyona."

Hati, nimwetegyereza, kibiina 'mwe? Ku twakubaasa kuzoora eki ezi saabiiti makumi mushanju ziri, nitumanya obu emperu eribaho. Oo, mugyensi! Ruhanga atuyambe tukimanye. Nikitugambira buzima ahantu omu mpapura ezi, buzima kuruga omu bwire obwo kuhitsya omu bwire obu, okuhitsya aha mperu, kandi tikirishobaho n'edakiika emwe.

Oku Ekigambo kya Ruhanga ky'amaani . . .

69 Ruhanga ku yaahangire ensi kandi akagita omu muhanda gwayo omu kaabunga. Kandi mbaire nimbuurira ijweri, Sande omu kiro, oku hatariho kintu kyona ekiremwa. Ahabw'enki, egi nsi neehindukira kimwe gye okuhitsya obu barikubaasa kukugambira buzima obu eizooba n'okwezi birihinguranaho, omu myaka makumi abiri kuruga eriizooba okuhitsya aha dakiika yonyini. Tinkaabaasa kukugambira, eshaaha yoona ei twine omu nsi, neija kunagayo edakiika ibiri nari ishatu omu kwezi kumwe, nari eyeyongyereho edakiika ibiri nari ishatu, eshaaha ezirikukirayo oburungi ezi twine. Tihaine eki turikubaasa kukora kikahikiirira kityo. Ahabw'okuba, hariho ekintu kimwe kyonka ekihikiriire, ekyo ni Ruhanga. Kandi Ruhanga n'Ekigambo nikyo kimwe, n'ahabw'ekyo Ekigambo kya Ruhanga Kihikiriire.

Kandi ku twakubaasa kubona ebi biro, nitwija kubona buzima obu emperu eribaho. Nimukyetegyereza? [Abateeraine baagira bati, "Amiina." -Omur.] "Ziteirweho kuhitsya aha mperu." Omushororongo gwa 24, "abantu baawe n'orurembo rwawe orurikwera," nirwo Yerusaalemu. Nyine hanu emishororongo ogwa 21 . . . n'ogwa 24. Yesu eki akakigambaho omuri Matayo 24.

70 Hati, Ow'eishe-emwe Collins, ku araabe ari hanu akasheeshe aka, tindikumanya yaaba ariho nari atariho. Omu bibuuzo ijweri, akabuuza ekibuuuzo. (Ninteebereza ni kirungi ahariinye kukigamba, Ow'eishe-emwe Collins). Ahari, "Ekirikuzira ekirikuwerekyereza,' mwareeba, eki kyabaire nikimanyisa?"

Yesu akakigambaho, omuri Matayo eshuura ya 24, kandi naitwe nitureeba. Yee, Matayo 24:15. Hati ekyo ka nkitungye jubajuba, nikwo eki mubaase kukireeba, Yesu naagamba aha kintu nikyo kimwe hanu, naajuriza enyima omuri Danieli. Matayo 24:15, ahariimwe abarikuhandiika. Nimbenza, buri omwe hati, namunonga ekiro eki na-na Sande erikukurataho, mureete ezo karaamu n'empapura, 'habw'okuba turi . . . kureka ku oraabe oine orutambi rw'amaraka. 24, n'omushororongo gwa 15, "Mbwenu n'ahabw'ekyo ku . . ."

Kandi ku murireeba ekirikuzira ekirikuwerekyereza, ekyagambirwe nabi Danieli, . . .

Muteekateekye! Egi n'emyaka magana ana na makumi munaana n'eshatu, -ina, -itaano, makumi munaana na mukaaga kareho. Emayaka magana ana na makumi munaana na mukaaga kareho.

. . . nabi Danieli, kyemereire omu Mwanya ogurikwera, . . .

Hati muranzye omuri Baiburi zaanyu. Kiri omu bugo.

. . . (orikushoma ayetegyereze)

71 Hati, naagambira Abayudaaya. Nibenda kumanya, ".Ebya hekalu egi biri bita? Eryacwekyerezibwa ryari? Eryagaruka eyombekwe ryari? Ni ryari obu haribaho obwire obu hataribaho eibaare rigyerekire aha rindi? Kiryamara bwire burikwingana ki?"

Akagira ati, "Ku murireeba 'ekirikuzira ekirikuwerekyereza, kyemereire obu . . .' Danieli, akeemerera omu mwanya ogurikwera?" Yaagira ati, "Ku murireeba eki kyabaho, hati k'ogwo orikushoma ayetegyereze eki arikugambaho."

Egyo niyo nshonga erikutuma twashaba Ruhanga, ngu ekyo akihikiirize kimwe, kugira ngu hataija kubaho akacuucu na kamwe k'okubangaanisa. Ahabw'okuba, titushemereire kuta enshoboorora yoona aha bintu ebyo. Nikiteekwa kwija kurabira omuri OKU NIKWO MUKAMA ARIKUGIRA. N'ahabw'ekyo, ninkirekyera aho okuhitsya obu ndaayetegyereze.

72 Akamushuururira ebintu byona, "ekirikuzira" ekyo.

Kandi, mwijukye, kiine amakuru g'emiringo ebiri, nka, "kweta omwana wangye kuruga Misri." Nka Israeli oku yaayetsirwe kurugayo, nikwo na Yesu, Omwana We, yaayetsirwe kurugayo.

Kandi ekyo buzima kirabaho, buzimazima nk'oku nyemereire hanu. Kandi Akakikora omu muringo, kandi kyona Akikozire kisherekirwe, kyona kisherekirwe Ekanisa. Oo, ku turaahikye omuri ekyo, omuri okwo kwetegyereza okw'emirundi mukaaga, oku eki kyona Akisherekire Ekanisa; kugira ngu Ekanisa eryaba ekitegypereze buri dakiika, teramanyire obu Yaabaire naija. Kwonka hati obusingye bw'Ekanisa buri haihi kuhwa, n'ahabw'ekyo hati eyeteekateekyeire Okwija, neetandika kwetekateeka.

73 Eki nikyo Kyahandiikirwe kimwe ekirikukirayo obukuru omu Kitabo. Nikikora ki? Nikitumanyisa okuhwaho

kw'obusingye bw'eihanga ry'Ekiyudaaya, Abayudaaya. Ekyahandiikirwe eki, saabiiti makumi mushanju, nikishuuura kandi kyoreka omu bwijwire kuruga omu bwire obu Danieli yaatandikira okwo, okuhitsya aha muheru gw'emperu. N'emwe aha shaaha ezirikukirayo obukuru. Ni bangahi abarampuriire ningira nti, "Ku oraabe nooyenda kumanya ni kiro ki kya saabiiti, reeba ahari karendra. Ku oraabe nooyenda kumanya ni bwire ki obu tutwiremu, reeba Abayudaaya"? Ekyo kihikire. Ngigyo karendra ya Ruhanga, eyaihirwe hanu honyini. Otendekirwe omu by'ediini weena, omwesi wa Baiburi weena, omuntu weena, naija kukugambira ngu aba nibo b'okumanyiraho eshaaha, Abayudaaya.

Hati twine bwire ki? Turi nka . . . abantu, nihootsy, oo, ni . . .

Tikiine katwate n'Abanyamahanga; Obumanyiso Mushanju obu, Ebibonaboneso Mushanju, Ebibonaboneso Mushanju, Enzamba Mushanju, tibiine kakwate. Ekanisa y'Abanyamahanga eryaba eri omu Kitiinisa omu bwire obwo. Tibiine kakwate naitwe, Ekanisa y'Abanyamahanga. Nizikoragana na Israeli. "Danieli, abantu baawe na Yerusaalemu."

74 Hati, kandi nizishuuura ebintu by'amazima ku Ruhanga akoragana n'Abayudaaya baaba bari omu nsi yaabo y'obutaaho honka. Haleluya! Aho niho ndikuteekateekyera ngu kyahika aha nshonga, aho honyini.

Burijo nibagyezaho kukiihirira omu bwire obu Isreali yaabaire eri okwo omu bwire bwa Danieli. Kandi omuhandiiki mukuru omwe . . . Habw'okuba, nimmanya bamwe omu bakuratsi be bashutami hanu, tindikuza kukigamba. Kwonka egyo niyo nshonga baabaire baine ebintu by'ebishuba ebi byona.

75 Nimumanya oku aba Millerite, batakabaire aba Seventh-day Adventists, eki baakozire aharuguru hanu? Omu gwa 1919, bakakwata amapapa gaabo, (mwena mukireebire omu rupapura rw'amakuru orwa Courier), reero baaza aharuguru hanu kugira ngu bagurukye beegyendere, akasheeshe ako. Ekyo kikaba nikitwara saabiiti makumi mushanju za Danieli. Ah-haa, Millerite. Kandi, ahanyimaho, barikwebemberwa Muka Ellen white, owaabaire ari nabikazi waabo, bakahinduka reero baayeyeta Seventh-day Adventisits. Mbwenu hati bahindwire eziina ryabo ryaba Eiraka ry'Obunabi. Mwareeba? Amaziina ashatu agatarikushushana g'ediini emwe y'ekikwangara.

76 Hati, kwonka bakaba bagwire, ahabw'okuba bakaba nibagyezaho kuta ezo saabiiti makumi mushanju ahari bombi Abayudaaya n'Abanyamahanga. Kandi Naagamba hanu ati, "N'ahabw'abantu baawe." Kandi Ruhanga takakoraganaga n'Abayudaaya bari aheeru ya Palesitaini. Kandi ku Mesia, aha saabiiti makumi mushanju, na ibiri, yaihirweho, (t'Ahabwe; ahabwaitu, akaihwaho), Israeli ekataataana, kandi tekagarukaga (na kakye) omu nsi yaabo y'obutaaho okuhitsya omu myaka mikye ehangwire. N'ahabw'ekyo, obwire tiburabazirwe aho ahabw'obusingye bw'Ekanisa. Mwakitunga? [Abateeraine batu, "Amiina." -Omur.]

Tigukaabaire omwaka gwa 1919. Nimbaasa kworeka ekintu ekyabaireho omuri 1919, kwonka obwo n'obu Maraika ogwo, obutumwa bwa Maraika wa kashatu bwatandika n'Ekibonaboneso kikatandika. Buzima. Kwonka kikaba kitari . . . Obwo n'obu orutaro rwayemerera omu muringo ogutarikwetegyerezibwa. Ekyo nitukitunga omu shuura ya 7 ku turaakihikyeho, ku turaahikye aha shuura ya 7. Mwena murampuriire ekyo ninkibuurira, emirundi mingi, mwareeba, obu obutumwa bwa Maraika bwagira buti, "Kingira emiyaga ena y'ensi kuhitsya obu turaate akamanyiso aha Bayudaaya, abahuuku." Kandi, hati, bakaguma bategyereize kuhitsya obu obusingye bw'Abanyamahanga bwona bwahweire.

Bwanyima ku Araataahemu, obwo-obwo Naata akamanyiso aha Bayudaaya, emitwaro ikumi na ina n'enkumi ina nibatunga Omwoyo Orikwera. Mbabo aho emitwaro ikumi na ina n'enkumi ina, bateirweho akamanyiso. Okushuururwa 7. Mugishomire.

"Kandi nkareeba omubaro muhango guri omu Iguru," Yohaana akareeba, "ab'enganda zonna, endimi, n'amahanga, kandi baayemerera omumaisho ga Ruhanga, baine enkindo omu ngaro zaabo, kandi bajwaire ebijwaro ebirikwera, nibeeshongora. Bati, 'Haleluya! Amiina! Ekitiinisa, obwengye, okuhimbisibwa, amaani, obushoboorozi, n'ebya Ruhanga waitu ebiro n'ebiro. Amiina!' baagamba n'eiraka rihang."

77 Yohaana tarabaasize kwetegyereza obunaku obwo. Kwonka akaranzya enyima kandi yaareeba aha Rushozi Sinai, (ekitiinisa) emitwaro ikumi na ina n'enkumi ina abaabaire batakeeshiishaga n'abakazi. Abayudaaya! Abakazi, amakanisa! Bakaba batakeegaitaga aha bibiina by'amadiini, Abaluteeri, Metsodisiti, Baputisiti, n'aba Puresibateeri. Kwonka bakaba bari Abayudaaya kuruga omu kutandiika, Orthodox, kandi bakaba baineyo hekalu okwo, nibaramya aha Rushozi Sinai. Abo nibo emitwaro ikumi na ina n'enkumi ina. Ekyo ni ahanyima y'eki; Ekanisa yaaherize kuza omu Kitiinisa. Mwareeba?

N'ahabw'ekyo, Omw. Smith akaba agwire, nikwo yaabaire naateekwa kuba. Habw'okuba, nooza kuta ekyo ota hanu omu mwaka gwa 1919, okaihayo emitwaro ikumi na ina n'enkumi ina? Kyaba kiri kityo noogaruka omu ba Russellite omurundi ogundi. Mwareeba? Kyaba kiri kityo noogarukira kimwe omu nyegyesa y'aba Russellite, erikugira eti, "Yesu akaija omu mwaka gwa 1914. Omu mwaka gwa 1919 Yaatwara Ekanisa Ye. Mbwenu hati, n'omubiri gw'omubonano ogurikwehinguririza niguzeereera omu nsi, niguzoora . . . niguba aha kituuro kya mukaaka n'ekituuro kya tatenkuru, nigubazoora boona kurugamu, abo boona abaabaire bari aba Russellite." Obushema! Tikiine makuru omu Kigambo. Tikirikurugayo gye. Ngaaha, sebo. Tikirikurugayo gye.

78 Kwonka, Ruhanga aine Amazima. Kandi Ruhanga niwe omwe Orikubaasa Kukishuuura kandi Akakita omu mwanya gwakyo aho, kandi Akakitworeka buzima. Mwareeba? Niinyikiriza ngu Naija kukikora. Tindikukimanya. Nimbagambira Amazima. Tindikumanya, kwonka niinyikiriza. Niinyikiriza ngu Naija kukikora.

N'ahabw'ekyo, nimureeba, Ruhanga takakoraganaga n'Abayudaaya. (Niinyenda ngu eki mukigumye omu biteekateeko) kasita Israeli . . .

79 Obwo nibwo naagyerizeho kugambira ow'eishe-emwe ogu oshutami hanu, orikugamba aha by'okuza Israeli, otaza Israeli! Mutazayo, bantu 'mwe mwena abarikugamba aha kuhindura Abayudaaya. Obutumwa obu butakahweire, nimwija kureeba ku ni OKU NIKWO MUKAMA ARIKUGIRA, ahabw'Ekigambo n'ahabw'Omwoyo. Israeli eryahindurwa, eihanga ryona, omu kiro kimwe. Baiburi nikwo yaagizire. Kwonka n'Engiri tebatumiirwe. Hariho endeme nkye eziri aheeru, n'abandi nk'abo abaataahiremu, kandi abari aheeru y'ekibiina kikuru ky'Abayudaaya, abaataahiremu kandi bakajunwa. Ago n'amazima. Ekyo ninkiikiriza n'omutima gwa-gwangye gwona.

Kwonka, mwijukye, kasita Israeli eba eri aheeru y'eihanga ryabo, tibakaabaasa kujunwa. Hati nibagarukayo. Kandi baryajunwa, eihanga ryona rizima, omu kiro kimwe. Baiburi nikwo yaagizire. Ekiro kimwe; kiryleeta, kyarimwe, Israeli yoona egarukire Ruhanga. Haryabaho ekintu ky'amaani nk'ekyo kikore ahari Israeli ekiro kimwe omu biro ebi, kuhitsya obu kiritengyetsa eihanga ryona. Nangwa na nabi akagamba n'eiraka rihango, kandi yaagira ati, "Omu kiro kimwe okozire eki." Omu kiro kimwe, Baryakireeba.

80 Haryabaho ekintu ky'amaani.

Om u kureeba kwangye, aryaba ari nabi w'amaani oryaimuka reero ayemerere omu maisho ga Israeli, kandi abahamize ngu Mesia ogwo akiri ohuriire. Ogwo Mesia ou baayangire ni . . . ? . . .

Bo bariyo nibashoma ego Baiburi nkye hati, ya Baiburi ya Israeli. Nibagishoma nibagiiha enyima kugaruza omu maisho, omuringo ogu Barikugishomamu. Kandi nimumanya orurimi rw'Ekiyudaaya oku rurikuhandiikwa. N'ahabw'ekyo Baagishoma . . . Kandi nibashoma ezo ezi Lewis Petrus yaabooherereize, Baiburi mirioni. Bakagira bat, "Yesu ogu ku araabe . . ." Abo bakaba bari Abayudaaya abaihirwe omuri Iran, kandi na ifo okwo batakahiraga ekintu nk'ekyo nka Mesia. Kandi ku baayeteekateekire kugaruka omu nsi yaabo y'obutaaho, ahabw'enki, bakaba batarikuza kutemba enyonyi ezo. Bakaba nibakihingisa amafuka gakuzire. Mukishomire omu katako k'amakuru akarikwetwa Look. Ni bangahi abaashomire ebyo borthandiko omu butabo bw'amaku . . . obwa Look na Times? Ahabw'enki, buzima mukabishoma. Mwareeba? Bakaba batarikubaasa kugitaahamu. Rabi omugurusi akeemerera aheeru aho reero yaagira ati, "Mwijukye, nabi waitu akagira ngu turyagaruka omu nsi yaitu y'obutaaho aha mapapa g'empungu." Haleluya!

Amahanga nigeecwamu ebicweka, Israeli neesiisiimuka,

Obumanyiso obu Baiburi yaarangire;

Ebiro by'Abanyamahanga ni bikye, n'ebirikutiinisa biijwiremu.

"Mugarukye, Imwe abataataine, owaanyu."

Kikaabaire kirungi musisiimukye. Mukihuriire kandi mwakihurira, kandi mwakihurira, kwonka nigwija kuba omurundi gw'aha muheru, kimwe omu biro ebi.

81 Abaisraeli nibagaruka omu nsi yaabo y'obutaaho. Ekiro eki Ruhanga araateereho Israeli kuba eihanga, ekyo nikyo kiro eki hataribaho Munyamahanga ondiijo owaajunwa.

Niinyija kuhamya ekyo ahabw'ezi saabiiti makumi mushanju, ku naakubaasa kubona ebyo biro byonka. Naaza kuza aha . . . kuronda zaakarenda ez'abarikushoma eby'enyonyoozi n'eb'y'omu kaabunga, n'e-n'eya Julia, ego ey'okushoma eby'enyonyoozi n'eb'y'omu kaabunga, n'ey'Ekirooma, kandi n'ezo zoona. Hariho n'ezindi, ahanti hantu. Hariho ekintu nanka. Ruhanga naakimanya, kandi, Na-Naabaasa kukishuuura. Mwareeba? Nimmanya ngu karenda ya Julia eine ebiro magana ashatu na makumi mukaaga na bitaano na kimwe kya kana ky'ekiro, omu mwaka. N'ahabw'ekyo, oo, boona babuzabuziibwe, kwonka hariho amazima ahantu nanka.

82 Nindeeba amakanisa maingi munonga, ebibiina by'amadiini bingi munonga, abantu baingi munonga nibagyenda bat, kandi abandi bat, "Kasingye Mariya," kandi n'abandi nibaramya eki, na kiriya, n'ekindi. Nihateekwa kubaho Amazima, ahantu nanka. Nihateekwa kubaho Ruhanga, ahantu nanka. Nihateekwa kubaho Obutumwa, ahantu nanka. Nindeeba baanabi b'ebishuba nibaimuka, nibatooreza okumanya eby'omu mitima y'abantu, kandi n'endijio miringo yoona y'ebintu ebirikugyenda omumaisho. N'ahabw'ekyo, nihateekwa kubaho eky'amazima okwo, ahantu nanka, ahi ekyo kikwangara kirikukomooka.

83 Nindeeba abantu nibataaha omu bunyamubiri, kandi nibateera orwari, kandi bakora ebitashemereire, reero bashohora kandi batuura amagara g'emiringo yoona. Aho nihateekwa kubaho Omwoyo Orikwera ow'amazima, ahantu nanka. Nindeeba abantu nibeehindura abanyadiini, n'ebindi nk'ebyo, kandi nibagyezaho kuba abarikutiina Ruhanga. Nimmanya ngu hariho Ruhanga ohikire, ahantu nanka. Hariho Omwoyo ohikire, ahantu nanka, 'habw'okuba ogwo n'endyarya ya ira erikutooreza, ekikwangara kya ira. Nihateekwa kubaho ekintu ky'amazima;

omuntu nanka, abantu nanka, Ekanisa nanka, Ruhanga nanka. Nihateekwa kubaho ekintu ky'amazima, ahantu nanka, 'habw'okuba ebi bikaihwa aha kintu ekyo buzima. Hariho ekintu ky'amazima, ahantu nanka.

Nkagambira ekanisa egi, ebikwatsire aha biconco byanyu. [Ow'eishe-emwe Branham yaakongoota aha kituuti emirundi ena -Omur] Muhuririze ebiconco byanyu; mubigumye omuri Baiburi. Mutatwara ekitarikyo, kandi obwo akaabunga kaijwire ebiconco by'amazima. Ka tugumye ebyo eby'amazima. Ka tutungye eby'amazima nari shi tutagira na kimwe. Amiina.

84 Hati, omu kuhendera, n'eky'amazima ku Ruhanga akoragana na Israeli yaaba eri omu nsi yaayo y'obutaaho kwonka. Ka tukwate obu Ruhanga . . . Abrahamu akaruga omu nsi ye y'obutaaho kandi yaashuma yaaza omuri Misri, hakabaho ki? Akagyenda yaaruga omu kukunda kwa Ruhanga, kandi tarahairwe mugisha na kakye okuhitsya obu yaagarukire omu nsi ye y'obutaaho. Ruhanga tarakoragaine nawe, nangwa n'okworekwa kumwe, hatariho kindi kintu kyona, okuhitsya obu yaagarukire omu nsi ye y'obutaaho.

Mureebe ahari Israeli obu baatwarwa eifo okwo omuri Misri, emyaka magana ana. Hatariho ky'amahano na kimwe, hatariho kamanyiso na kamwe, tihariho kintu na kimwe ekyabaireho ahagati yaabo, tikihandiikirwe omu byafaayo by'Ekitabo. Ni makumi mwenda na mwenda abo aba ira, kuza aha kanisa, kuhayo omwana gw'entama, kugamba "Kasingye Mariya," nari eki kyabaire kiri kyona, n'okugarugayo. Omwaka ogwakurataho, omuringo nigwo gumwe. Abanyamurwa boona bakateesa bat, "Rabi Nanka na nanka! Nituza kutoorana Rabi Nanka na nanka. Aine obwegyese burungi kukiraho. Naamanya Abanyamisri kukiraho." Eky'okubanza noomanya, Abanyamisri n'a-n'abo boona, bakaba bari ekintu kimwe.

85 Ekyo kintu nikyo kimwe ekibaire aha kanisa. Twena tukaza kuba aba Metsodisiti, nari aba Baputisiti, nari aba Puresibateeri. "Kandi twine diguri kuruga omuri Hartford! Twine diguri kuruga omuri Wheaton! Twine diguri kuruga ahandi hantu, nari kuruga omuri Bob Jones! Itwe, twine diguri ya Bachelor of Art! Twine diguri ya D.D., L.L.D., nari ekindi kintu!" Kituhikize nkahi? Omu bushema bwonka.

Okwo nikwo kyabaire kiri omuri Misri.

86 Kandi Ruhanga tarakoragaine na Israeli okuhitsya obu baizire omu nsi yaabo y'obutaaho.

Mumpurire! OKU NIKWO MUKAMA ARIKUGIRA, Ruhanga tarikoragana n'Ekanisa Ye okuhitsya obu Eraije ekagaruka omu nsi y'obutaaho, Obutumwa bw'obwire. Mugarukye aha bwabandize! Murugye omu biteekateeko byanyu by'okuba owa Metsodisiti, Baputisiti, Puresibateeri; ebyo byanyu by'Ekipentekoote, Assemblies, Obumwe, Obushatu, n'Obutaano, eki kiri kyona; ediini ya Church of God, Nazarene, Pilgrim Holiness, church of Christ, byona n'ebibiina bya antikristo! Kandi nimmanya ngu eki nikikwata aha nsi munonga. Byona bigwire; byona n'ebiya Sitaane. Oo, mugyenzi! Hariyo abashaija abarikutiina Ruhanga omuri buri kimwe omu bibiina ebyo. Hariyo abantu abarikutiina Ruhanga omuri buri kibiina. Kwonka ekibiina ky'ediini, omurikyo, ti kya Ruhanga, kandi Ruhanga tarikisha mugisha. Takakikoraga.

87 Nimbuuza omunyabyafaayo weena (nooza kuhurira orutambi rw'amaraka oru) kumpandiikira kandi akangambira obwire bwona, ekanisa obu yaayekoziremu ekibiina, Ruhanga ku araabe ataragiteire aha materekyero kandi atakoragane nayo bundi. Ngambira obu Aragarukire kwimutsya aba Luther, Wesley n'aba Metsodisiti, nari Abapentekoote. Takakikoraga! Ebyo bibiina by'amadiini bikaguma aho, byasiisikara kandi byajunda! Ruhanga akakwata abantu bonka reero yaagyezaho kworekyereza abantu abo kugaruka omu nsi yaabo y'obutaaho. Kandi bwanyima, abantu bonka tibainiire kimwe maani kandi nibeetwara nk'abakazi, baine nka diguri y'omuringo gumwe, okuhitsya obu baakozire ekibiina ky'ediini ekindi, baakikora omwana wa gehena kabiri okukira oku kyabaire kiri omu kutandika.

88 Kwonka, ahantu nanka, buzima, Yehova aine omuntu ou Yaakubaasa kutaho engaro Ze, otarikwija kufungura Ekigambo aharibo . . . -kutiina Ruhanga, n'ekibiina ky'ediini ekitarikutiina Ruhanga; orizunguza abantu akabagarura aha Rukiri, Kristo Yesu, akabagarura ahari pentekoote eyaabandize kandi n'Omwoyo Orikwera owaabandize, n'obumanyiso bw'okubanza n'eb'y'okutangaaza ebyabandize. Buzima Aine omwe, ahantu nanka, otaraije kuhwa amaani ahansi y'okuhiigwa kwa buri muringo gwona, akatoroka, akabishazamu, akagwa, n'ekindi kintu kyona; origuma nakyo.

89 Ruhanga takahaga mugisha Israeli okuhitsya obu egaruka omu nsi yaayo y'obutaaho.

Ruhanga tarikuha mugisha, ori owa Metsodisiti, Baputisiti, Puresibateeri, Omukatoriki, nari owa Pilgrim Holiness, owa Nazarene, church of Chrsit, nari-nari ekibiina ky'ediini y'Abapentekoote. Tarikuha mugisha ori otyo. Garuka omu nsi yaawe y'obutaaho, aha kutandika, garuka aha bumanyi bw'Abapentekoote nk'oku kyabaireho aha Kiro kya Pentekoote obu Amaani ga Ruhanga ohuriire gaahindura ezo nkumi n'enkumi z'abantu, kandi gakacumika omuriro omu mitima yaabo n'Omuriro gwa Ruhanga, ogwayorekire obumanyiso bw'amazima; butari bw'okutooreza, kutari kumanya eby'omu biteekateeko ahabw'emigyeroko, butari bw'okushungisa, n'okuza omu mpaka z'okukiraakirana nk'oku tubiine omuri Amerika. "N'oha orikubaasa kugira eihema eririkukira agandi?" Nari, "N'oha orikubaasa kugira enteerane ezirikukira ez'abandi?" Nikireetaho ntaaniso ki ahari Ruhanga? Ruhanga naayenda abantu kuba abeesigwa omu mitima, gutari mutwe muhango gw'abantu. Kandi twena twine empaka z'okukiraakirana hanu, eziriyo nizigyenda omumaisho. Ka nikishwaza, kureeba twaba nitubaasa kwongyeraho

abandi rukumi aha kibiina kyaitu. Nikishwaza. Naayenda ngu tugarukye aha Mazima, tugarukye omu Mwoyo, tugarukye aha Mushana oguhikire, tugarukye omu muhanda rugyendwa omuri Kristo, tugarukye aha Mazima. Aryabaasa ata kutuha omugisha omuringo ogu turimu? Tarituha mugisha.

90 Tarahaire Israeli omugisha kuhitsya obu baagarukire omu nsi eyaaragaanisiibwe. Kandi ku baagarukire omu nsi eyaaragaanisiibwe, obumanyiso n'ebi'okutangaaza byatandika kubaho. Akaboohereza omuntu omwe ahagati yaabo, orikwetwa Musa. Musa ogu akashuma na kintu ki, okwega eby'ediini okunyiriire? Akaija na diguri ya Bachelor of Art? Akashuma na diguri ya LLD., PH.D.? Akashuma n'amaani ga Yehova, kandi aine obutumwa, "Mugarukye, kuruga omu nsi egi, kuza omu nsi yaanyu y'obutaaho. Mugarukye, Imwe abaataataine, owaanyu." Amiina!

91 Haihi okumara emyaka enkumi ibiri, Abayudaaya batwire bari aheeru y'ensi yaabo y'obutaaho, bataataaniire omu miyaga ena y'ensi. Ka twakubaasize kutuma Obutumwa obu bwamara zaasaabiiti hati, ku twakutaaha omu kubutondoora. Nitubaasa kukuratira Israeli kugarukira kimwe enyima kandi tworekye obu yaataataanisibwa n'Obutegyeki bw'Abarooma, ahanyima y'okwanga Mesia; oku baabingirwe bakaza omuri buri ihanga ahansi y'Eiguru.

Tugarukye ahari Yakobo, Israeli, enyima omu kitabo ky'Okutandika 44 na 45, kandi tworekye enyima okwo nk'oku yaahaire omugisha baatatenkuru abo kandi akabagambira buzima omwanya gwabo ahu bariba omu biro by'aha muheru. Kandi nimbaasa kubooreka buzima (buri ihanga) rya Israeli, buri ruganda rwa Israeli, ruri buzima omu ihanga eri kyagambirwe ngu ruryabamu. Kandi aha niho turi ebiro ebi.

92 Omuyudaaya ou turikumanya, ogwo tiwe Muyudaaya w'amazima. Omuyudaaya kashushu n'ogwo ow'enyikiriza ya Orthodox w'amazima oteeshiishire n'ebintu by'ensi, otakashohoire aheeru kandi akeegaita n'agandi makanisa. Nibo abo abariyo nibagaruka seeri, abarikutuurira eby'okurya ebikozirwe omu majuta g'ente n'omugaati, aha mbaju z'orushozi, abatarikwikirizibwa kuza omu rurembo rwa ira. Kikabeetaagisa kwombeka orurembo aha rubaju oru, omu mwanya ogutari gw'omuntu, n'embundu za mashiini gaani zoorekyereziibwe embaju zoona. Kwonka yaatandikire kutooka. Amiina, kandi amiina! Obwire bwiriire haihi.

93 Mbabo aho Ishmaeli na Isaaka, beemereire aho, nibatonganira ensi egoy, kandi nabwo, kwonka n'eya Israeli. Ku kiribaho okaza omuri Yerusaalemu ensya, tibarikwikiriza kuhika omuri Yerusaalemu eya ira. Nikikwetaagisa kubanza waazayo reero obarekye babikushoboororere byona, Abaharabu, bwanyima bakutware seeri aha rundi rubaju. Abo n'abaana ba Ishmaeli. Kwonka, tegyereza, obwire nibwija obu abaana ba Ruhanga barigikubuura. Ekyo kihikire. Yerusaalemu eryagaruka eyombekwe ogundi murundi. Ekitambo ky'obutoosha kiryateeewaho.

Kandi antikristo aryakora endagaano ahabw'ezo saabiiti makumi mushanju z'aha muheru. Kandi ahagati yaazo, aryasheenya egoy ndagaano, boona abahindure abataasye omu Bukatoriki. Ekirikuzira kiryajanjaara kihikye omu myanya yoona, batyo, reero emperu nibwo eribaho.

94 Mureebe, "saabiiti makumi mushanju." Yee, baine haihi emyaka enkumi ibiri ei bamazire aheeru y'ensi yaabo. Hati babingirwe. N'abantu abari nk'oku kyabaire kiri omuri kuri kugangaaza omutima gwa Faraho. Kikamwetaagisa kugangaaza omutima gwa Hitler. Mirioni z'abo bakafa. Mureebe Eichmann ogu, oine orubanja rw'okwita Abayudaaya mirioni mukaaga. Mirioni mukaaga z'abo, amagara g'abantu, abeereere, abaana bato, abantu bakuru, boona bakaitwa; Einchmann, omuntu omwe. Mureebe Russia, oku mwababingire mukabaihayo. Bakababinga buri hantu. Batwire bari eihanga eririkugaya.

Kwonka ahabw'okukunda esente zaabo, bakagaruka ogundi murundi. Kwonka abo bantu bakte bariyo nibagaruka kutaaha omuri Palesitaini. Amiina, b'eishe-emwe!

95 Ku muribareeba batandika kugaruka omu nsi yaabo y'obutaaho!

Baineyo abantu hati abarikumara kukora abo haihi emitwaro ikumi na ina n'enkumi ina. Reero n'enki ekirikubaho? Nibaija kumanya Yosefu waabo. Mutafaayo. Eego, sebo. Kandi boona beemereire aho bakitegyereize kubaho. Kandi eshaaha yonyini ei . . .

Amahanga gabbarangiriire ku n'eihanga, ogu mwaka oguhweire. Ekyo ku kiraakorwe, turi haihi n'emperu, Ekanisa y'Abanyamahanga egyenzire. N'ahabw'ekyo, haihi obwire bwona, Ruhanga naabaasa kugira ati, "Israeli n'abantu Bangye." Ekyo kyabaho, Abanyamahanga bahweire.

96 "Baryaribatirira," Yesu akagamba, omuri Matayo 24. Ati, "Ekirikuzira ekirikuwerekyereza, baryaribatirira engo z'amabaare za Yerusaalemu okuhitsya obu obusingye bw'Abanyamahanga burihwaho." Ebyo ku birihwa, obwo Abayudaaya baryagaruka omuri Yerusaalemu, kutandikaho busya hekalu n'okuramya kwa hekalu. Nituza kubitunga byona omu Butumwa obu oburukukurataho, sabiiti makumi mushanju z'ebigyendererwa mukaaga.

Hati ninza kushoma ekyo tutakahendeire, 'habw'okuba haihi obwire nibuza kuba bwahikire itwe kuza omuka, bwanyima tugarukye eki shaaha emwe.

97 Eky'okubanza, okubanza, ku muraabe nimukihandiika, "Ebicumuro bihwe." Danieli, eshuura ya 9, omushororongo gwa 24. "Ebicumuro bihwe," kimwe. "Ebibi biihweho," bibiri. "Okutahikiirira kurihiirirwe,"

bishatu. "Okureeta okuhikiirira okutarihwaho," bina. "Ebyorekirwe n'ebahanwirwe baanabi biteebweho akamanyiso," bitaano. "Aharikwera munonga hashukweho amajuta," mukaaga. Kandi ebyo nibyo turaagambeho ekiro eki. Ruhanga, naahikiiriza!

98 Hati murindeho, ka ngarukye nkirabemu, nikwo mukitungye. Eky'okubanza, "ebicumuro bihwe." Eky kabiri, "ebibi biihweho." Eky kashatu, "okutahikiirira kurihiirirwe." Eky kana, "okureeta okuhikiirira okutarihwaho," Eky kataano, "ebyorekirwe n'ebahanwirwe baanabi biteebweho akamanyiso." Eky mukaaga, "Aharikwera munonga hashukweho amajuta."

Ka nkibashomere hati, kuruga-kuruga omuri Baiburi. Ni omushororongo gwa 24.

Makumi mushanju- . . . saabiiti makumi mushanju ziteirweho ahabw'abantu baawe (Abayudaaya) n'orurembo-n'orurembo rwawe orurikwera (Israeli, Abayudaaya, Yerusaalemu), ngu ebicumuro . . . bihwe (kimwe), . . . ebibi biihweho (bibiri), . . . okutahikiirira kurihiirirwe (bishatu), . . . (okureeta) okuhikiirira okutarihwaho (bina), n'ebiorekirwe biteebweho akamanyiso (bitaano)-ebyorekirwe n'ebahanwirwe baanabi, (n'Aharikwera munonga hashukweho) amajuta (mukaaga).

Ebyo buzima nibyo Yaizire kumugambira, ebyabaire nibiza kukorwa, reero emperu ebeho.

Hati, ekiro eki nituza kureeba eki ebintu ebyo biri, kandi tureebe oku turi haihi n'omwanya ogwo. Reero Sande eraakurateho, nituza kubitaasyamu kandi tubite omu mwanya gwabyo omu bwabyo buzima ahu twemereire. Nimukunda.

99 Abaisraeli nibagaruka omu nsi yaabo y'obutaaho, Israeli. Ka ngambe eki, hati tukiri . . . Ninteebereza ebi tibirikukwatwa aha rutambi rw'amaraka. Ka ngambe eki. Eshaaha egoyonyini obu Israeli yaaba eihanga . . . Niyo nshonga buruijo ntura niinyikiriza, omumaisho g'ekibiina kyangye hanu, ngu hakaba hariho ekintu eki naabaire ninza kukwatanisa nakyo, ntakafire, ky'okugarura Israeli ahari Mukama. Ahabw'okuba, obu eshaaha egoyonyini, aha kipande ky'aba Pan Amerika, obu Israeli yaarangirirwa ku n'eihanga, omurundi gw'okubanza omu myaka enkumi ibiri kwiha bataataanisibwa, batari ihanga; niyo yaabaire egoyshaaha emwe, eshaaha yonyini, obu Maraika wa Mukama yaambugana eruguru kuriya kandi akantuma aha . . . n'Engiri. Ekintu ekyo kyonyini, ebiro 7 Okwakataano, 1946.

Hati, kandi, ekindi kintu ekirikuumanisa. Ni "emitima y'abaana kugarukana n'ey'abazaire, n'emitima y'abazaire kugarukana n'ey'abaana," Obutumwa. Mwetegyereze, Malaki 4 (etari 3), 4!

100 Ekindi kintu. Obu Billy, mutabani wangye, naanye, Ow'eishe-emwe Ern Baxter, twabaire turi omu rugyendo rwaitu kuza Palesitaini, tuherize kubugana Abayudaaya ow'ow'eishe-emwe Arganbright, kandi bakareeba orwo ruteerane. Lewis Petrus akaba yaayohereizeyo Baiburi ezi. Reero yaagira . . . Abayudaaya aba bakaija, baagira bati, "Ku oraayete ekibiina ky'abeebembezi ba Israeli, nimmanyisa, batari baarabi aba abasya n'egoy mikoro yaabo yoona, kureka kweta abeebembezi bonyini b'Abaisraeli hamwe. Kandi tushomire egi Ndagaano Ensy, kandi nitumanya ngu Mesia ku ariija, Aryatugambira ebintu ebi, nk'omukazi oriya omuri Samaria. Nitumanya ku Musa yaagizire ngu Mesia waitu aryaba nabi. Kandi ku waakubaasa kubagambira kandi okaboreka, kurabira omu Byahandiikirwe," ekyo eki turaareebe omu Butumwa bw'ekiro eki, "ngu bakaba nibateekwa kugiibwaho omwirima n'emitima yaabo ekasharwaho, kugira ngu omwanya gw'Abanyamahanga gubaase kwija, kugira ngu tugire obwire bw'okugarukana kw'Abanyamahanga. Kandi emitima yaabo ekagangaazibwa buzima kwo nk'oku kyabaire omu bwire bwa Yosefu, n'ebindi nk'ebyo. Haza tureete abo Bayudaaya tubate omu mwanya, reero twete abashaija abo kuruga omu bateeraine abo, nk'oku orikukora Abanyamahanga aba hanu, n'okwebemberwa okwo kw'Omwoyo." Habw'okuba, bakagira bati, "Yesu ogu yaaba, ku Araabe ari Mesia, n'ebigambo byawe biri amazima, obwo Tafire, kandi Ahuriire. Kandi ku Araabe ahuriire, Akaragaanisa kuba omu muher- . . . we . . . Omuheereza-abaheereza Be, abakuratsi Be. Kandi ku twakubaasa Kumureeba naakora akamanyiso ka nabi, obwo nitwija kwikiriza ku ni Mesia."

Ka n'ekintu ekihikire, kihikiire kimwe. Mbwenu, ekyo kikaakora ki? Eihanga rikaazaarwa omu kiro kimwe, omu beebeembezi. Buri omwe omuribo akaagira ati, "Nitukimanya." Rabi ogwo ku araagambe ekyo, ekyo nikimara. Eihanga rikaazaarwa omu kiro kimwe. Israeli ekaazaarwa omu kiro kimwe.

101 Kandi nkaba ndi omu rugyendo rwangye, reero naayemerera omuri Cairo, Misri, nyine tikiti omu mukono gwangye, kandi hatsigaire edakiika ikumi na itaano nari makumi abiri tukeetwa. Bakaba nibeetebeekanisa kweta. Reero naashuhuma naaza kureeba ekicweka kikye ky'omuti ogurkwiragura ogu, ogwabaire gubeizirwemu ekishushani ky'enjojo nto aha rubaaho rw'omuti ogurkwiragura, eine o-omwino. Nkaba ninza kukyohrerereza dokita munywani wangye, Dokita Sam Adair, nk'eky'okuhamya empapura ngu zitatwarwa omuyaga. Kandi nkaba nkhangire amaisho. Reero Ekintu kyangambira kiti, "Obwire tibukabaire. Otaza Palesitaini."

N'ahabw'ekyo naateekateeka nti, "Ogwo niinye buzima owaaba naateekateeka ekyo." Reero naagumizamu.

Ekintu kyagira kiti, "Obu tibwo bwire."

Reero naashohora naaza enyima y'egaragi y'enyonyi. Naimutsya omutwe gwangye ahari Ruhanga. Naagira nti, "Ruhanga, ogwo Niiwe owaaba noogamba naany?"

102 Ati “Obwire tibukabaire. Otaza Palesitaini. Obwire tibukabaire.” Bwanyima naatwara tikiti yangye naagihindura, reero naarugayo naaraba eruguru omuri Rooma, kandi naagaruka Lisbon, omuri Portugal, reero kuruga okwo naagaruka Amerika.

Obwire bukaba butakahikire. Eby'okushiisha by'Abanyamahanga tibikaijwire, kuhika aha munwa gw'ekikopo. Kwonka ekiro kimwe ekyo kiryabaho, kandi Ruhanga aryayoherezayo omuntu ori nabi, kandi aryabibahamiza. Niinyesiga ngu Ruhanga aryamwimutsya ahonaaho, weena ou yaakubaasa kuba ari, ogwo aryamwimutsya juba. Niinyikiriza nikiteekwa kwija. Ekyo nikyo turikwegyera eki, ngu twiriire haihi munonga.

103 Kandi, mwijukye, edakiika ego yonyini ei Abayudaaya baraayakiire Kristo, Ekanisa y'Abanyamahanga neeba yaagyenzire. Obwo Abanyamahanga baryashukwaho ebibonaboneso, Okubonabona.

Mbwenu-mbwenu abantu, abeegyesa b'amaani nibabaasa bata kwegyesa, kandi nibareeba egi Baiburi bat, haza bakagira ngu Ekanisa neeraba omu bunaku bw'Okubonabona, kunu hatariho Ekyahandiikirwe omuri Baiburi ekirikukigamba! Tibaine kintu na kimwe.

104 Omuntu akangambira, obwire bukye obuhingwire, yaagira ati, “Oo, Ow'eishe-emwekazi McPherson akeegyesa ngu Ekanisa eryaraba omu Kubonabona, 'habw'okuba turyaba turi omushana ogurikwaka omu bwire obwo.” Obwire obwo ni Israeli, ti Banyamahanga.

Abanyamahanga baaherize kugyenda, Ekanisa. Tibarikwetaagisibwa kuraba omu Kubonabona kwona. “Ekijoka kikacwera amaizi kuruga omu kanwa kaakyoo,” eshuura ya 17, “kandi kyatenga orugamba n'abo abatsigaireho,” omwishiki oshugaine ogwejegyeire. Teri . . . Ekanisa y'amazima yaagyenzire. Yaahikire ahari Kyakiro y'Obugyenyi bw'okugaitwa ahabw'ebi, ekicweka ky'obwire ahu Kyakiro y'Obugyenyi bw'okugaitwa buriba nibugyenda omumaisho, saabiiti y'aha muheru. Kandi obwo nibwo Okubonabona kurikutaahiramu, obu enzigye n'okuhiigwa biryaimuka aha makanisa, ebintu nk'ebyo.

Bwanyima, aha muheru, omu shuura ya 19, ngugu hanu Yaija ari na Kishwera We. Haleluya! “Omugabe w'abagabe, kandi Mukama w'abakama; ekijwaro kijabikirwe omu Shagma, kandi n'eihe ry'omu Iguru ritembire embaraasi zirikwera, nirija Nawe. Ngugwo Omugore naija, kutwara omwanya Gwe ahabw'Okutegyeka kwa Kristo kw'Emyaka Rukumi. Amiina! Oo!

Rihimbisibwe Eiziina, oo, rihimbisibwe Eiziina,

Rihimbisibwe Eiziina rya Mukama;

Rihimbisibwe Eiziina, oo, rihimbisibwe Eiziina,

Rihimbisibwe Eiziina rya Mukama.

Yesu niryo Eiziina, Yesu niryo Eiziina,

Yesu niryo Eiziina rya Mukama;

Yesu niryo Eiziina, oo, Yesu niryo Eiziina,

Yesu niryo Eiziina rya Mukama.

Singiza Eiziina Rye, oo, singiza Eiziina Rye,

Oo, singiza Eiziina rya Mukama;

Singiza Eiziina, oo, singiza Eiziina,

Singiza Eiziina rya Mukama.

105 Nookikora ota? Noorihindura rikuru omu magara gaawe. Nootuura amagara nk'ago agu barikubaasa kugira bat, “Ngugwo omuheereza wa Kristo.” Okwo nikwo orikusingiza eryo Eiziina. Ka tureebe. Oo, Timurikumukunda? [Abateeraine baagira bat, “Amiina.” -Omur.] Oo, mugyensi! Ekyeshongoro kyaitu kikye hati;

Ira munonga omu kihongore, nimmanya buzima nikwo kiri,

Omwereere akazaarwa kujuna abantu kubaiha omu bibi byabo.

Yohaana Akamureeba aha nkungu, Omwana gw'Entaama ebiro n'ebiro,

Ogwo Mwana gw'Entaama oine Obumanyiso Mushanju, niwe Ogwo wenka omu Iguru n'omu nsi owaabaire naabaasa kukikwata. Omu koho- . . .

Ira munonga omu kihongore, nimmanya buzima nikwo kiri,

Omwereere akazaarwa kujuna abantu kubaiha omu bibi byabo.

Yohaana Akamureeba aha nkungu, Omwana gw'Entaama ebiro n'ebiro,

Oo, rihimbisibwe Eiziina rya Mukama.

Oo, rihimbisibwe Eiziina, oo, rihimbisibwe Eiziina,

Rihimbisibwe Eiziina erya Mukama;

Rihimbisibwe Eiziina, rihimbisibwe Eiziina,

Rihimbisibwe Eiziina rya Mukama.

106 Ninkunda okuramya. Imwe timurukukunda? [Abateeraine bati, "Amiina." -Omur.] Hati, titurikwija aha kanisa kuhurira eishomo kwonka; ebyo nibigyenda nakyo. Kureka nitwija aha kanisa kuramya, okuramiza omu Mwoyo n'omu Mazima. Mwahurira Amazima; ekyo n'Ewigambo. Mwareeba? Hati, okuramya, n'Okumweshoboororera. Mwareeba?

Oo, Ninkunda Ogwo Mushaija Wa Galilaaya! Tuheereze eiraka kakye ahari ekkyo. Eego, sebo. Nookimanya, Teddy? Naayebwa hati. Ka tureebe. Ka tureebe.

Oo, ninkunda ogwo Mushaija wa Galilaaya, wa Galilaaya,

Ahakuba Ankoreire bingi munonga.

Asaasiire ebibi byangye byona, yantamu Omwoyo Orikwera;

Oo, ninkunda, ninkunda ogwo Mushaija wa Galilaaya.

Omuhooza akaza kushaba omuri hekalu okwo ekiro kimwe,

Yaataka ati, "Mukama, ongirire embabazi!"

Yaasaasirwa buri kibi, kandi yaatunga obusingye bwangi;

Yaagira ati, "Ija, orebe Omushaija ogu wa Galilaaya."

Oo, ninkunda ogwo Omushaija wa Galilaaya, wa Galilaaya,

Ahakuba Ankoreire bingi munonga.

Asaasiire ebibi byangye byona, yantamu Omwoyo Orikwera.

Oo, ninkunda, ninkunda ogwo Mushaija wa Galilaaya. Ebirema bikagyenda, ebiteta byagamba.

Ago maani gakagambwa na rukundo aha nyanja empango.

Empumi zikareeba, nimmanya ngu kikaba nikibaasika ahabw'

Amaani g'ogwo Mushaija wa Galilaaya gonka.

Oo, ninkunda ogwo Mushaija wa Galilaaya, wa Galilaaya,

Ahakuba Ankoreire bingi munonga.

Asaasiire ebibi byangye byona, yantamu ogwo Omwoyo Orikwera.

Oo, ninkunda, ninkunda ogwo Mushaija wa Galilaaya.

Muhurikize eki.

Omukazi aha iziba, Akamugambira ebibi bye byona,

Oku yaabaire aine abashaija bataano obwire obwo.

(Niwe Ogwo.)

Akasaasirwa buri kibi kye, kandi yaatunga obusingye bwangi;

Bwanyima yaagambira ahaiguru ati, "Mwije, mureebe ogwo Mushaija wa Galilaaya!"

Oo, ninkunda ogwo Mushaija wa Galilaaya, wa Galilaaya,

Ahakuba Ankoreire bingi munonga.

Asaasiire ebibi byangye byona, yantamu Omwoyo Orikwera.

Oo, ninkunda, ninkunda ogwo Mushaija was Galilaaya.

107 Nimukunda. Imwe timurikumukunda? [Abateeraine baagira bati, "Amiina." -Omur.] N'omutima gwangye gwona! Naimwe tikwo? ["Amiina."] T'Ow'okutangaaza? ["Amiina."]

Oo, naatangaaza, naatangaaza, Yesu nikwo ari ahariinye,

(We niki?)

Omuhanuuzi, Omukama w'Obusingye, We ni Ruhanga Ow'obushoboorozi bwona;

Oo, nanjuna, nandinda ekibi kyona n'okushwara, Omucunguzi wangye naatangaaza, muhimbise Eiziina Rye!

Ka twinikye emitwe yaitu hati haza tukiteekateekyeho.

Rimwe nkaba nzaahire, kwonka hati nzaahukire, tinyine rubanja, (amahanga nigeecwamu ebicweka; tikiine nshonga)

Yesu naaha obusingye n'okujunwa okwijwire;

Nanjuna, Nandinda ekibi kyona n'okushwara, Omucunguzi wangye naatangaaza, muhimbise Eiziina Rye.

Oo, naatangaaza, naatangaaza, Yesu nikwo ari ahariinye, Omuhanuuzi, Omugabe w'Obusingye, We ni Ruhanga ow'Obushoboorozi bwona;

Nanjuna, nandinda ekibi kyona n'okushwara, Omucunguzi wangye naatangaaza, muhimbise Eiziina Rye!

Oo, mukiteekateekyeho!

Rimwe nkaba nzaahire, kwonka hati nzaahukire, tinyine rubanja,

Yesu naaha obusingye n'okujunwa okwijwire;

Nanjuna, (Naakora ki?) nandinda ekibi kyona n'okushwara, (ninkiraba ahaiguru)

Oo, Omucunguzi wangye naatangaaza, muhimbise Eiziina Rye.

Hati twena hamwe!

Oo, naatangaaza, naatangaaza, Yesu nikwo ari ahariinye,

Omuhanuuzi, Omukama w'Obusingye, We ni Ruhanga Ow'obushoboorozi bwona;

Ahabw'enki, nanjuna, nandinda ekibi kyona n'okushwara,

Omucunguzi wangye naatangaaza, muhimbise Eiziina Rye.

Oo, ka ninkunda Yesu, (ekitiinisa!)

Oo, ka ninkunda . . .

Nyine amashemererwa maingi ahabw'okuba njunirwe! Nyine amashemererwa maingi ahabw'okuba ntegyereize Okwija Kwe!

Oo, ka ninkunda Yesu,

Ahabw'okuba Akabanza kunkunda.

Hati twimutsye emikono yaitu ahaiguru, ku turaabe nitukimanyisa.

Tindimutsigaho,

Tindimutsigaho,

Tindimutsigaho,

Ahabw'okuba Akabanza kunkunda.

108 Nimumukunda? [Abateeraine baagira bati, "Amiina." -Omur.] N'ahabw'ekyo nimuteekwa kukundana. Habw'okuba, ku oraabe otarikukunda abo abu orikubaasa kureeba nangwa na hanu, noobaasa ota Kumukunda Ou otakareebaga? Ka tukwatane omu ngaro, tugire tuti;

Oo, ka ninkunda Yesu,

Oo, ka ninkunda Yesu,

Oo, ka ninkunda Yesu,

Ahabw'okuba Akabanza kunkunda.

Tindi . . . (Mwereeze emikono yaanyu Ahariwe hati. Nikyo ekyo.) . . . tsigaho,

Tindimutsigaho,

Tindimutsigaho,

Ahabw'okuba Akabanza kunkunda.

109 Teekateeka kwonka, Akatumanyisa okwo kushuuruurirwa kukuru. Titurikumukunda? [Abateeraine baagira bati, "Amiina." -Omur.] T'Ow'okutangaaza? ["Amiina."] Ka nitusiima ababwa Mukama waitu Yesu; taritutsigaho. "Reeba, Ndi naimwe burijo, n'okuhitsya aha . . ." Nimushemerererwa Saabiiti Makumi Mushanju Za Danieli? ["Amiina."]

Oo, Titurikumukunda? Nitukikora tuta?

Okwikiriza kwangye Niiwe kurikureeba,

Iwe Mwana gw'Entaama owaabambirwe

Mujuni . . .

Muramye kwonka, oihire aha mutima gwawe.

Mpurira hati naaba ninshaba,

Onyiheho ebibi byangye byona,

Ka kuruga eriizooba

Mbeere kimwe Owaawe!

Naaba nindaba omu mianda eshobenkaine y'amagara agarimu omwirima, (twena nitugirabamu)

Kandi nyehinguririziibwe enaku (Eego, Mukama.)

Ombeere omwebembezi; (Nyebembera ozindabyemu, Mukama.)

Omwirima guhindure omushana,

Ondagazeho obwoba bw'enaku,

Otarindeka kuhaba

Nkakurugaho.

[Ow'eishe-emwe Branham yaatandika kweshongora abumbire akanwa Okwikiriza Kwangye Niiwe Kurikureeba -Omur.]

Ha amaani omutima gwangye ogugwire enshazi,

Ontere omuzimbwe;

Omwirima guhindure omushana,

Ondagazeho obwoba bw'enaku,

Ka kuruga eriizooba

Mbeere kimwe Owaawe.

110 Ai Yesu, nitureeba nitwirira haihi ekintu. Isaaya nabi akakigambaho; Yeremia yaakigambaho. Danieli akaranzya enyima kandi yaareba eki baagambire. Kikaimutsya omutima gwe, reero ya-yaayorekyereza obuso bwe Eiguru. Akeesiibyakwo, ekijwaro ky'eguniya n'eiju. Akaba naayenda kuhurira, kugira ngu abaase kuraburaabantu.

Mukama, nitureeba okuruga omu Bitabo, naitwe, Ekitabo Kyawe, Ekitabo kya Isaaya, Ekitabo kya Yeremia, Ekitabo kya Yakobo, Yohaana, Luka, Mako, Matayo, Ekitabo ky'Okushuuruurwa, Ebitabo Byawe byona, ku turi haihi n'emperu. Kandi tworekyereize obuso bwaitu Eiguru, omu kushaba, okweshengyereza, okuzoora ahu tutwire, Mukama. Nitutandika kureeba omushana niguturuka. Kandi, Mukama, nitwija Ahariwe. Okwikiriza kwaitu Niiwe kurikureeba hati. Nitujuura ebirkuturemeera byona, buri kibi, buri butaikiriza bukye obwakubaasa kutwezingirira, nitwezirika hati kuhika aharikuhanirwa ah'okwetwa kw'ahaiguru, nitumanya ngu obwire bwaitu ni bukye.

111 Ha omugisha abantu aba abari omunda hanu, Mukama. Nibakukunda. N'Abaawe. Barugireyo. Niiwe Ogwo orikushuuuru. Nitushaba ngu Otuhe ebintu ebi twaba Tukutegyereize.

Tuhe eihangwe rirungi ry'okushoma, Mukama. Tuhe okwetegyereza. Tugarure eki omurundi ogundi, twine amaani. Mukama, nshukaho amajuta eihangwe eri, oo, naaba ninshoma, Mukama, ahawb'enshonga ezi mukaaga z'okutaayaaya kwa Gaburieli. Gaburieli ku araabe yaizire kutaayaaya kandi akaha amakuru g'emirundi mukaaga, Mukama nituteekwa kugamanya. Nitushoma omu Bitabo kandi tumanya ngu turi haihi. N'ahabw'ekyo nitushaba ngu Nooza kukitushuuuruira eki eki.

Sande eraakurateho, Mukama, Ai Ruhanga, ebiro ebyo bitaasyemu. Tindikumanya ni muringo ki, kwonka Noobaasa kutuhikiza kimwe aha bwire. Kituhe, Taata. Niiwe ou tuteireho amaisho. Nitukundana kandi Eshagama ya Yesu Kristo, Omwana wa Ruhanga, etuschemeizeho ebibi byona. Niiwe ou tuteireho amaisho hati. Tuhwere twaba Tukutegyereize, Taata, kurabira omuri Yesu Mukama waitu.



www.messagehub.info

Obutumwa obu bukabuuirwa
William Marrion Branham
“... omu biro by'eiraka ...” Kush 10:7